

忠
肅
集
附拾遺
三





忠 肅 集

附 拾 遺

(三)

劉 華 撰

忠肅集卷十一

神道碑

畢文簡神道碑

故丞相文簡畢公。既以景德三年葬鄭州管城馬亭盧村之原。而隧道之碑未果立。後八十餘年。公諸曾孫從周仲達等。乃相與經治紀刻。而使仲游抵書敘其故。以銘見屬。某視公之時。良已遠。然考其事蹟。有門生故吏之狀。幽宮之銘。太常有議。國史有傳。家有譜集。又雜見于他書傳記。與夫章章在士大夫者。類非一事。參驗可信。皆合不誣。于是獨掇大要而論次之。惟畢氏出于姬姓。周文王之子高封國于畢。後以爲氏。後漢兗州別駕。諶之五世孫曰衆慶。爲宋兗州中正。又五世曰憬。仕唐。至計州刺史。憬二子。構爲戶部尚書。諡景公。栩爲鄆王府司馬。栩曾孫誠。相懿宗。構五世孫稹。爲振武天德營田判官。稹生宗昱。是爲公之曾王父。爲代州雲中令。王父球。本州別駕。考父琳。澶州觀城令。及公貴。襲贈雲中而下三世。爲太子太保。太傅。太師。追封曾祖妣吳氏。鄧國。祖妣史氏。韓國。妣藥氏。代國。祝氏。鄭國。並太夫人。上世始居雲中。太師既終。祝夫人謂公曰。學必求良師友。乃相與如宋。又如鄭。得楊丕。劉錫。楊樸。使公與遊。而卜居焉。今爲鄭州人。公諱士安。字仁叟。以學行爲名進士。乾德四年。王晉公祐知貢舉。第公甲科。辟邠寧幕府。開寶

三年爲濟州推官。太祖皇帝召對。廷授兗州管內觀察推官。太平興國初。改大理寺丞。領三門發運事。吳越錢俶入朝。選知台州。旣至。言錢氏上圖籍。有司皆張侈賦數。今湖海新民。始得天子命吏。宜有安輯。且州縣文書具在。願一用舊籍。以示惠澤。詔從之。明年。以治最遷。太子右贊善大夫。徙饒州。改殿中丞。歸朝。爲監察御史。知乾州。以便親。改監汝州稻田務。雍熙中。諸王出閣。召爲左拾遺。冀王府記室參軍。太宗皇帝延見。勞問蕃錫。遷尙書考功員外郎。端拱中。詔王府官各上所爲文。帝問近臣曰。文吾旣知之。其行孰優。皆以公對。帝喜曰。是也。以本官知制誥。淳化二年。召爲翰林學士。大臣以張洎言。帝曰。洎視舉某詞。藝踐歷固不減。但履行遠在下。遂爲學士。于時宋興四十年。中外幾平。文學政事言語侍從之臣。輻輳朝廷。至論德行。則常以公爲稱首。明年。知貢舉。轉主客郎中。以疾請外。改諫議大夫。知潁州。真宗皇帝以壽王尹開封也。召充府判官。爲皇太子。以兼右庶子。遷給事中。及帝踐阼。卽日拜樞密直學士。工部侍郎。權知開封府。以嚴正稱。凡官府常從授庭職。而補外任者。必遣至公所受戒飭。時近臣有怙勢爲不法。強買民家定昏子者。公請對白其橫奪還之。而公亦以禮部侍郎罷府。還爲翰林學士兼祕書監。時契丹謀入寇。公首疏五事。應詔陳選將餉兵理財之策甚備。常多納用。于是中書闕。宰相乃准公吏部侍郎參知政事。入謝。帝曰。未也行且相。公頓首辭謝。帝曰。朕倚卿以輔相。豈特今日。然方多事。求與卿同進者。誰其可。公復頓首謝曰。宰相者必有其器。乃可居其位。臣鷲朽實不足以勝任。寇準兼資忠義。善斷大事。此宰相才也。帝曰。聞其剛使氣。對曰。準資方正。慷慨有大節。忘身徇國。秉道疾邪。此其素所蓄積。朝臣罕出其右者。

第不爲流俗所喜。今天下之民。雖蒙休德。涵養安佚。而西北跳梁爲邊境患。正若準者所宜用也。帝曰。然當藉卿宿德鎮之。不閱月。拜公本官平章事。寇公實並命。而以公監修國史。位在上。旣而契丹益犯邊。北州皆警。二公始合議。請帝幸澶淵。時景德元年九月也。契丹統軍順國王撻覽引兵分掠。威擄順安北平。侵保州。攻定武。數爲官軍所卻。益東駐陽城淀。遂攻高陽。不得逞。轉窺貝冀。天雄兵號二十萬。帝坐便殿。問策安出。公與寇公條所以禦備狀。且言澶淵之行。當在仲冬。寇公謂當亟往。不可緩。卒用公議。初咸平六年。雲州觀察使王繼忠戰陷敵中。至是爲敵人奏請議和。大臣莫敢如何其事。獨公以爲可信。乃贊帝當羈縻不絕。漸許其成。帝謂契丹凶悍如此。恐不可保。公曰。臣嘗得降人言。今雖深入。屢挫不甚得志。陰欲引去而恥無名。且彼寧不畏人乘虛覆其穴。此請殆不安。繼忠之奏。臣請任之。帝喜。乃手詔繼忠許其請和。時已詔巡幸。而議者猶闕闕。二三大臣有進金陵及成都圖者。公亟同寇公請對。力陳其故。堅定前計。帝乃幸澶淵。軍數十萬。契丹大震。然猖狂乘衆。猶掠德清。至澶淵北鄙。會官軍伏弩發。射撻覽死。衆潰遁去。而曹利用使還。亦具得要領。與其使者姚東之俱來。講和之計遂定。嗚呼。朝廷惟無大事也。事一動。利害繫其中。而人蔽所見。甲曰如此。乙曰如彼。方是時。非沈幾達識以定其是。眞忠大器以任其決。一反乎爲全軀保妻子計。則成敗之機。亦曰殆哉。觀景德之事。所以威靈抗于上。和好成于下者。公本精于策畫。排紛決疑。力引寇公故也。初帝嚴兵將行。太白晝見。流星出上台。北貫斗魁。或言兵未宜北。或言大臣應之。公適臥疾。移書寇公曰。屢請昇疾從行。而手詔固不許。今大計已定。惟在君勉之。某將以身當星變。

而就國事所願也。已而少間。追至澶淵。見于行在。及從還兵罷。乃按邊要。選良守將。易置之。雄州以李允則。定州馬知節。鎮州孫全照。保州楊廷明。他所擇用。各得其任。令塞上得境外牛馬類者。悉還之。以示信。遂通互市。除鐵禁。招流仁。廣儲蓄。未幾。夏州趙德明亦款塞內附。二方既定。中外略安。量時制法。次第施行。如權酷毋得增額。平反已決死罪。錄爲勞訟。不干己者。坐以重。至今不易。復置賢良方正直言極諫等科。以廣取士。每對必爲帝言崇儉息民。近忠直。遠諛佞。是爲政要。故未幾。天下無事。號爲至治。公素羸多疾。歲中求去位。章至七八。皆不許。二年十月十二日。將朝。至崇政殿。廬得疾。詔問絡繹。帝不俟輦。步至公所。敕太醫及近侍隨護。肩輿還第而薨。年六十八。帝卽日臨奠。哭之慟。贈太師中書令。廢朝五日。制服發哀。以皇城使愛州刺史衛紹欽治葬。有司給鹵簿。大鴻臚持節護葬。諡曰文簡。公資端重。偉儀觀。少以名節自厲。貫于夷險。白首不易。平生無一語過差。雖貴。奉養無異平素。未嘗殖產。爲子孫計。故天下稱其清。而其亡也。帝謂寇公曰。畢某君子人也。事朕南府東宮。以至輔相。飭躬慎行。有古人之風。晚年益觀書。所藏經史。字皆方寸。手自讎正。其文章典雅。以古爲法。集爲三十卷。平生慎交遊。無黨援。惟王晉公呂公端見引重。王文正公寇萊公楊文公億相友善。王翰林禹偁陳彭年皆門人也。公旣引寇公同政。而寇公守正疾惡。小人多不便。日思所以傾之者。布衣甲宗古告其交通安王元傑。寇公惶恐。莫知所自明。公力辨其誣。下宗古吏。具得奸罔。斬之。寇公乃安。禹偁濟州白屋子。嘗以事至公官舍。陰識其非常童。留之。教以學。誨育獎進。學業日顯。後遂登科。進用更在公前。及公繼知制誥。其命乃禹偁辭也。公去潞州。州事連禹

僞亦謫黃州。公猶厚資其行人。稱公知人爲有終始者。後王文正公爲相。嘗面奏曰。陛下前稱畢某清慎。如古人在位聞之感歎。仕至輔相。而四海無田園居第。沒未終喪。家用已屈。今其妻有貸于臣家者。其清可見。真不負陛下所知。然使其家假貸爲生。宜有以周之者。竊謂當出上恩。非臣敢爲私惠時也。帝聞嘆息。賜白金五千兩。公娶駱氏。封陳國夫人。二子曰世長。公薨時爲太子中舍。終于衛尉卿。曰慶長。時爲大理寺丞。終于太府卿。孫九人。從善。光祿寺卿。從古。駕部郎中。從厚。從誨。檢校水部員外郎。從蘭。惠州博羅令。從道。殿中丞。從範。山南西道節度推官。從益。太常寺太祝。並亡。從周。今爲朝散郎。知洋州。曾孫仲達。而下若干人。官多至郎大夫。入文館省寺。或出爲郡守使者。世以爲盛。公以雅望者德。被遇三聖。出入禁省。莊靖慎密。及在大位。知賢能薦。謀慮國事。惟幾惟深。輔政雖纔逾年。而克於勳烈。中外乂安。郡國豐登。刑罰衰減。忠清之德。有始有卒。天下至今稱爲名相。銘曰。

真宗允文。考慎相臣。孰以德進。畢公其人。帝曰畢公。文考之錫。尹正于京。予曰羽翼。束闡左右。忠孝子迪。景德之始。旄頭騰芒。戎馬空國。塵我北方。公來相予。賞罰紀綱。公拜稽首。臣朽不勝。有大忠義。以茹斯征。協于一德。引宮應商。圖上吳蜀。彼誰弗臧。兩公諤諤。駕言觀兵。六飛絕河。于橋之陽。威既遠加。乃錫之平。帝還曰。咨釐我庶治。材鉅守方。審政張弛。惠經中國。底定四裔。公在相位。時無幾何。有事有勞。有成可歌。逝也胡亟。帝慟而嗟。三師正令。榷賻有加。溱洧之右。旣葬旣久。立碑墓旁。龜趺螭首。鋪張清風。以詔不朽。孰究孰營。公有孫曾。清白之社。百世之承。

唐質肅神道碑

公諱介。字子方。姓唐氏。惟唐氏世譜。其始遠矣。至漢初。厲從高祖起豐。爲斥邱侯。後十七世彬仕晉。封上庸侯。又二世輝爲前涼臨江將軍。始居晉昌。稍分徙太原京兆北海。北海之後。瑾仕周。開府儀同三司。臨淄公。臨爲唐禮部尙書。天寶之亂。子孫又散去。有爲唐山令曰熊者。居餘杭。生子曰希顏。天復中。以明經爲建威軍推官。是爲公之高祖。曾祖仁恭。爲吳越鹽鐵巡官尙書水部員外郎。祖渭仕皇朝。至尙書職方郎中。始自餘杭家江陵。遂爲江陵人。考拱。左班殿直。公旣貴。贈曾祖太子太保。追封妣盛氏英國太夫人。祖太子太傅。妣夏氏嘉國太夫人。考太子太師。妣兩崔氏崇國光國太夫人。公十三歲。丁太師喪于漳州。家故貧。州人賻之者。泣謝不受。侍母夫人護喪歸江陵。養親終服。無違于禮。天聖八年。第進士。爲鼎州武陵尉。郡掾鞠獄實。旣決。狼曰。驗死不明。乃尉之罪。私請曰。驗罪輕。鞠罪重。公憐其言。爲受罰。調岳州沅江令。縣民龍氏上書。訟分田不均。坐不實。徙以死。其子陳寃。更數令不得直。公躬至田所。按圖契。是非立辨。遂均其田。州民李氏以高貲。爲上下所漁擾。或者不厭。因告其祠鬼用人。守喜擊斃。則速繫其家百口。極獄之慘。情不得。奏公治有能名。專屬之。公考閱實。非殺人者。守又奏。以爲未盡。詔殿中侍御史方偕移劾于澧州。卒用公所具。獄不能變。以武康軍節度推官知夔州奉節縣。寶元二年。轉運使。應詔舉充三路知縣。遷祕書省著作佐郎。知莫州任邱縣。縣當信使驛。往返誅索繁急。其下因緣爲奸利。異時俛首趣事。莫敢何辨。公爲作區畫。預居其物。每使至。親坐驛門。給之一。以法令從事。應復還而毀失者。移文取其償。故

過者皆戢。上下便之。塘水歲浸邑田十一村。而塘實中人主之。州縣畏其勢無以拒。公募民自高陽起堤。互鄭十餘里蔽之。其患遂息。丁光國太夫人憂。服除。知相州安陽縣事。改祕書丞。皇祐初。河決。其所監司。舉公通判德州。二年。改太常博士。徙通判廣信軍。未至。召爲監察御史。裏行。轉尙書主客員外郎。殿中侍御史。裏行。宗室請買官地。公言可。予則賜之。不可者勿聽。而使輸直非也。內侍督作龍鳳車于啓聖院。公言此太宗神御所在。爲後宮輿服故。喧黷其中。又車飾金玉過制。皆非是。詔罷之。張堯佐以恩澤。一日。除宣徽節度景靈羣牧四使。公言不可。因引唐天寶所以致禍敗者。旣累疏。乃與諫官等七人極論殿上。又白御史中丞留百官班。將廷議。卒奪其景靈宣徽兩使。明年。賜五品服。未幾。堯佐復爲宣徽使。知河陽。或謂補外不足論。公曰。宣徽次二府。不分內外。獨力爭之。仁宗皇帝諭曰。除擬初出中書。公言是當責執政。退請全臺對不許。自請罪又不許。章十數上。遂劾宰相附會堯佐。諫官朋比。事及宮掖。因請采公議。別擇用大臣。其言堅直。帝亟召二府示以疏。公面質宰相曰。自惟有是事乎。君前禮毋得隱者。樞密副使。壓公下殿。猶爭益切。遂貶春州別駕。明日。改英州。遣內侍隨之。制出。人情驚愕。于是敕朝堂告諭百官。又明日。罷宰相。黜諫官。公怡然南去。絕口不爲人道。當此之時。天下士大夫識與不識。聞風歎慕。聳然有立志。往往作爲文章以頌詠其美。自是言事官以畏嘿爲恥。而大臣亦知所鑒戒云。四年。檢校水部員外郎。全州團練副使。監彬州稅。稍復祕書丞。又復主客員外郎。通判潭州。五年。復殿中侍御史。知復州。未至。召充言事御史。帝遣中使齋告身。就賜乘驛赴朝。蓋皆異禮也。入見。帝曰。知卿守節。謫官以來。無私書至公卿間。

公頓首謝。退就職言事。無所避如故。假工部員外郎。直集賢院。開封府判官。至和元年。知揚州。辭曰。帝復諭曰。卿孤立不移所守。今雖在外。無忘規補。賜服三品。俄徙江南東路轉運使。嘉祐元年。侍御史吳中復請還官言路。時潞國文公再當國。亦言唐某頃爲御史。所言皆中臣病。而責太重。願如中復言召之。遷工部員外郎。河東轉運使。戎人侵耕。河西經略使令築堡限之。麟州守將輕出按視。賊奄至。與戰而沒。朝廷罷易帥臣。公攝事。卽絕其互市。盛兵境上。戎人懼。及來請議。事平多如公策。三年。徙淮南。江浙荆湖都大制置發運使。入爲三司度支副使。四年。以本官拜天章閣待制。知諫院。同提舉萬壽觀。帝自至和後。御朝淵嘿。公言君臣如天地。以交泰爲治。願時延訪羣下。發德音。可否政事。以幸天下。又言賞罰不可以貴賤輕重。如孫沔呂溱。修縱宜深責。必行則衆信矣。論宮禁。千丐恩澤。其命不由中書。此古所謂斜封。非盛朝所宜有。請裁放後宮冗數。罷祈禳齋醮之不經者。諸路走馬承受使臣。凌擾郡縣。可罷勿遣。以權歸監司。天下配軍。至死無赦。與古律意異。宜令有司差其重輕。有所縱遣。仍著爲法。又言士節不立。願委大臣進敦朴忠厚之士。稍抑聚斂文法吏。以銷刻薄浮競之風。國朝祖陵在保州。自楊懷敏廣塘水。稍稍侵近。議賜錢改卜。公言遷久安之神。以其地與水。非尊祖之道。兗國公主夜開皇城門入禁中。請重責守者。以嚴宮省。是年。充北朝生辰國信使。五年。轉禮部郎中。權發開封府事。時御史中丞劾宰相未報。乃自去官。號不出。宰相亦待罪。公與諫官御史連請辨其曲直。于是罷御史中丞。公亦求外補。得知荆南。而門下封還制書。謂公不宜處外。乃留復知諫院。言新除樞密副使與內侍通姻。不可大任。屢疏卒罷之。而公亦去知

洪州翰林學士胡宿等七人上書懇留不報。七年，拜龍圖閣直學士。河北都轉運使明年，英宗皇帝卽位，遷吏部郎中，除樞密直學士。高陽關路安撫使，知瀛州。治平元年，召爲御史中丞，首言先帝在位四十餘年，天下樂利，惟仁治而已。願恢聖度，廣恩德，則爲善繼。四海蒙福矣。帝重其語。公前後三在言職，名鯁切，無所回忌。明年，拜龍圖閣學士，知太原府。河東經略使，至則首戒邊將毋生事。初，代州尙嵐軍西夏數擾邊，公遣兵撤其所築境上堡柵，又移文諭以利害，嚴守以待之，遂不復敢動。其後寇大順城，環慶路帥移檄出兵牽制，公曰：「守邊之策，莫如自重，奈何以小侵故，使鄰道勞費，非至計也。」以事上聞，詔以諭西帥。公雖居外，意未嘗不在朝廷。于是濮王園廟之議起，言者多得罪。公憂形于色，密疏請還臺諫官之謫者。四年，神宗皇帝卽位，遷給事中，召拜三司使。有司議增官屋儼直，公以謂京師狃于恩，不喜擾，唐稅間架，可以爲鑒，恐所得不當所損，奏卒罷之。請出汴河運船于江湖，轉東南之粟，中外爲便。熙寧元年正月，拜參知政事。公自以進由直道，感慨知遇，益致所以事君之義，純誠盡公，多所獻替。用人明言其才否，不立恩，不避怨，與同列論政事，反復再三，終不屈。祖宗法有所更，近臣有所進退，尤極其慎。雖在帝前，必究切辨，析要是非之歸，未嘗反顧。帝以是益敬信之，而天下翕然想望其風采。二年三月，告疾，帝遣高醫相屬，內侍入問狀。驛召其子淑問于復州歸侍。四月，帝幸其第，臨問，出涕久之。某日薨于寢，車駕臨奠，哭之慟。明日，遣中使以禁中舊所畫公像，付其家傳之，輟視朝二日。賻卹有加，贈禮部尙書。官其子孫及外姓通九人，喪歸。所過治道發卒護送。太常議以公正而不阿剛，而能斷，諡曰質肅。以四年二月某日葬于江陵府。

江陵縣龍山鄉太師之瑩次公端勁之質。出于天資。立朝風格凜然。遇事立斷。初無留思。而遽于學問。待人恂恂有禮。自奉簡約。未嘗問事有無。將終。屬其子以修身持門戶而已。輔政裁逾年。年止六十。不得究施其志。此天下所以歎恨也。有文集若干卷。奏議二十卷。邊防利害五卷。娶楊氏。諫議大夫生之宗女。誥封魏郡夫人。子五男。淑問朝奉大夫。嘗爲御史。有直聲。能世其家風。義問某官。待問早亡。嘉問宣義郎。之問承事郎。二女。長適寶文閣直學士通議大夫謝景溫。次承議郎王某。孫十七人。今上元祐八年。將建碑墓。上來請文。乃論次其實。而系之以銘曰。

睿睿唐公。媚于三宗。好是正直。有言有庸。公之于言。剛不違義。伏奏殿榻。面劾大吏。引而質之。在列汗愧。不貶不明。瘴荒萬里。人于禍福。有擇而言。則迎則嘿。久酣爲安。虢然大聲。震彼惛惛。皇思其忠。士慶其返。乃踐中外。乃都休顯。公長憲府。人無邪譎。公總財省。民飽而裘。乃登輔弼。彌論政猷。祖宗典則。惟帝之求。國惟其仁。毋變以利。物惟其常。毋鑿以智。有或出此。予曷敢同。以劇以守。惟理予從。斯道之恃。隱然在公。天畀公厚。胡缺者壽。帝咨不愆。士民永疚。龍山之藏。有銘詔之。神隧之表。次詩在碑。百世無斁。正直之思。

墓誌銘

天章閣待制郭公墓誌銘

郭公諱申錫。字延之。大名人。天聖八年。以進士起家。釋褐瀛州河間縣主簿。丁父喪。服除。調蘇州長洲主

簿以親嫌易常州晉陵尉。邑民告賊殺其弟。公案之。其哭不哀而色懼。械付獄。果自殺之。民夸爲神明。移永寧軍博野縣令。用薦者改祕書省著作佐郎。知深州東鹿縣。通判雄州。會河決商胡。故相賈魏公薦知博州。墊溺之後。歲饑盜起。獲繫填獄。公曰。良民失職至此。請以輕典從事。詔許之。因招集拊循。流亡來歸。妖人王則反貝州。調發佐軍爲諸郡最。璽書褒諭。賊平民猶以習妖告奸。公謂汙俗未革爾。多從末減。有成卒謀亂。取其首惡刑之。餘置不問。仁宗閱奏。謂大臣曰。小官行事能若此。嘉歎久之。以尙書屯田員外郎爲御史臺推直官。數上疏論事。大臣或不便之。會慶州有滯獄。遣公就鞠。既還。復以非職而言。戒敕之。由是顯名。盜發濮州。張郭鎮。執通判井淵。以公知濮州。賜五品服。至未逾月。滅賊。徙遂州。未行。召爲侍御史。會靈容議復作。公上疏曰。古者兆四望于四郊。山川邱陵。各因其方。坎壇而無位貌。今哀方嶽之神。廟食京師。非典禮。殆天廢之。宜勿復。未幾。充言事御史。儂智高寇廣南。帥臣欲藉兵交趾。公言。小醜竊發。不時盪撲。更不須啓四夷。輕中國心。不可聽。遷刑部知雜事。判大理寺。吏部流內銓。貴妃張氏薨。贈后議禮如嫡。公言。位號尊卑。死猶生也。不容僭瀆。請下議者去其非禮。由是多所裁正。論狄青除樞密副使。賜第官二子。恩過優。曹彬平江南。無此賞。且智高尚在邊境。未寧。宜慎賞以勵有功。宰相姜張氏殺其婢。開封府鞠治闊略。公請移別獄。上優大臣弗許。爭不已。因劾開封撓法。宰相竟去位。府官吏多罷者。翰林學士歐陽修韓絳。以論斥。時政求補外。公曰。二人名臣。官在左右。爲重。得俱見留。至和中。契丹欲遣泛使議事。公言。河朔財匱。民困。吏苟簡曠職。軍旅不練。甚非所以建威消萌。上嘉之。賜三品服。明日。命爲河北體量。

安撫。傳至部。閱吏甚無狀者黜數人。事所廢置不一。歸條備邊大務十餘章。多見納用。拜三司鹽鐵副使。遷右司。充契丹國信使。嘉祐二年。塞六塔河。與河北轉運使李參典其事。初。皇祐中。議開六塔。使河東行。公言其非是。後果不成。東北被其患。至是議塞而參意見異。詔罷參。公因疏參他過。坐知濠州。丁母喪。服除。知滑州。拜直史館。知江寧府。轉禮部郎中。知滄州。英宗卽位。遷戶部。未幾。復召爲三司鹽鐵副使。入覲。首言滄州北近邊。東循海至青州殆千里。無障塞之阻。節制之統。謂宜以州建帥府。分河之東六郡隸之。爲一路。下其議。識者是之。拜天章閣待制。知鄧州兼京西南路安撫使。今上卽位。遷左司。軍士賞賚。或以不足欲貸之民。公發封椿錢益給之。僚佐以文爲言。公言有責守臣任之。省符至如公畫。從河中府召還。同糾察在京刑獄。判太常寺兼禮儀事。知滑州。請補北京留司御史臺。改左諫議大夫。就判二年。連請老。遂拜給事中。以待制致仕。熙寧七年五月八日。終于私第。享年七十七。累階朝散大夫。勳柱國。爵文水郡侯。食邑一千二百戶。公資安和。而內剛不苟。自奮苦。有志于當世。喜待士。推輓廉峻。人不可干。以私自奉。平約。雖貴顯。不易其度。守九郡。政明而下肅。人不見其所以爲者。獄之隱微。于談笑間得之。累官言路。自以遭人主眷納。遇事必盡言。慮遠而力彊。無所回忌。有大體。嘉祐中。霪雨。詔求直言。公言陛下享國久。皇嗣未立。人望無所屬。天下事寧復有大于此者乎。願推大公。早于宗子有所擇。以定國本。一雨沴未足。以爲憂。上與論政。有焦勞願治意。公曰。股肱得其人。則陛下處于無所爲可也。願止以擇宰相爲事。上高其說。嘗諭之曰。人臣爲小吏時。多喜奮擊論事。至稍用則緘默。是資言以進爾。朕所弗取。若卿可謂終始不二。

者公頓首謝。雅喜論兵。嘗著邊鄙守禦策。敘邊外山川風俗爲詳。种諤取綏州。公以謂貪尺寸地。使國墮大信。邊患將自此始。及諤祚死。又請捐前故。許其子襲爵。以示懷柔。嘗對上曰。二寇賴歲賜金幣。以爲國數渝盟。非其所利。必有以致之。但得重將守塞。不要功生事。則無寇患矣。退休與賓客語及邊事。輒慷慨喟歎。忘其身之老也。曾祖簡。祖晉。父悅。贈工部尙書。母李氏。封仁壽縣太君。妻李氏。陳氏。吳氏。封江夏穎川濮陽郡君。子三男。仁約。大理評事。義方。太常寺奉禮郎。早世。禮立。守將作監主簿。五女。專州博平縣令賈行先。陵州仁壽主簿李奎。求州祁陽縣尉鞏固。湖南轉運副使太常丞直集賢院蔡奕。興國軍永興主簿宋文虎。其婿也。孫男三人。志經。試將作監主簿。秉德。慎行。女二人。明年十一月二日。葬公于大名府元城縣孝義鄉感義里之先塋。三夫人祔。銘曰。

遠矣郭氏。出周姬宗。武封諸弟。號叔有功。地入于鄭。至于平王。邑以陽曲。繼絕存亡。轉號曰郭。後所以氏。支微派遷。大家于魏。煌煌代公。相唐元勳。惟文水侯。實其後人。侯有志學。善養而用。惟精惟深。罔釋弗中。諫官御史。前無彊權。善善惡惡。皇惟其言。謂仕不顯。論思左右。謂志達乎。澤未下究。進退直道。不辱其身。有善有施。在其子孫。有思在民。有譽在士。茲謂不朽。昭于千祀。

忠肅集卷十二

墓誌銘

東上閣門使康州團練使陶公墓誌銘

公諱弼。字商翁。少孤。慷慨有氣節。儀幹偉然。刻苦好學。經傳無所不讀。尤喜兵家書。從諸生科舉。不能投世俗所好。去而安貧事母。以經術教授鄉里。若無意于世者。慶歷中。莫徭諸唐寇略州縣。提點刑獄楊敞。被詔督捕。以禮奉幣致公。幕下。公喜。幡然以起。爲盡謀畫。俄率所募士破賊于桃油平。以功補衡州司戶參軍。又破太平峒。調桂州陽朔主簿。皇祐中。徙柳州司理參軍。歲饑多盜。繫者滿獄。公爲良民失職至此。多以傳生議。儂智高反。詔敞安撫。復辟公參軍謀。公自曲江下。會諸將議救廣州。賊旣解圍而西。公至太平場。會蔣偕軍覆于賊。餘衆潰走山林。公慮其與賊合。亟以便宜取白旗數面。大書曰。招安散。遣人持徇。悉收千餘人。所在貸糧以食之。送帥司。敞大喜。以公爲知權。敞還朝。語人曰。吾平賊湖外。所得者一陶某而已。用舉者移陽朔令。爲治有本末。號循良。勸民植木夾道。以庇暑暍。使者下。其法他邑。桂之靈渠水。自秦開導。下達江湖。歲久堙廢不通。公因攝興安。抵書安撫使蕭固。請加浚治。轉給邊食。可無勞民。固不省。後轉運使李師中。用其言。果大利。熙寧安南之役。移粟百萬。實由此渠。嘉祐初。改大理寺丞。監潭州糧料。

院六年師中時爲提點刑獄薦公知賓州未幾詔換崇儀副使以本路安撫都監知容州明年改六宅副使知欽州數以母長沙縣張夫人太君年老乞歸養不許八年遂丁喪乞解官終服又不許治平元年英宗卽位遷內藏庫副使明年拜崇儀使知邕州熙寧元年神宗卽位轉六宅使招納訓利等六州蠻僚萬餘口撫定廣源會千餘衆之內附者加右騏驎使再任邕自經皇祐兵火守將數易百綱頽紊一以苟簡從事公至罅者苴補之窒者疏剔之磨以歲月遂爲治府左右江州峒五十餘酋牽強虐漁利其下苦之公爲作約束曉以禍福違者一繩以法莫不帖然畏服歲滿以請知鼎州初熙寧初廣源賊酋劉紀請太平寨置和市使華夷貿易公測紀言蓋交人之謀將出入省地窺虛實屢卻不聽至于安撫司不深惟利害輒上其事公亟爲書數千言馳告于樞密院曰邕有士人十數類無他材幹造邊事爲市至右職乃有假守于彼嘗斥遠之未嘗聽其言故疆境幸按堵者凡七年今聞桂管惑紀奸謀實由此曹助成之決非所以安邊將產患無疑旣而和市議行無幾何交人以劉彝沈起戰艦陣圖事爲辭寇陷欽廉宜三州人服公精識六年朝廷遣察訪使處置南江諸蠻舉公知辰州且言公恬不上吏課者二十年特遷皇城使奉詔措置北江北江溪州彭師晏桀黠難制公用間使其黨爲仇相攻師晏因以衆數千來降羈首領十有九人致闕下取其地建五城堡詔加忠州刺史王師問罪安南以康州團練使知邕州于時邕人之不死于賊者往往逃匿山谷人情恟恟不敢進單騎先入左江峒民間公再至欣然次第來歸乃籍丁壯得二萬七千分隸諸將凡大軍所謂蹋白開道及致輜重皆峒丁濟之方此時元帥大兵壓賊境以公兵精

銳忌專有功。乃使之殿。然軍中事舉以咨訪。其禮遇之隆。他將不敢輩也。富良之役。賊請降以款我師。元帥召公計之。公曰。明公來時。陛受聖算云何。而棄垂成乎。元帥不之對。然竟納降。諸將入賀。公拂衣去。坐帳中。拊髀歎曰。三州之民。無辜屠死者數萬。今舉士馬十萬衆。賊已在手。而縱不取。以遂賊。使國威靈不暢。三州冤不復沮。一方之心。有可痛無可賀者。聲氣奮厲。聞者感動。師至宵還。既無前令。中軍先一夜引去。衆大擾相蹈藉。賊夾對壘。陰伺我隙。公居後安坐。下令休士。遲明整衆。按行。賊不敢動。元帥于是請城。劉紀所棄廣源地爲順州。以藉口。擇守者。皆憚行。乃以屬公。公初無難。未幾。賊取我桃榔縣。意圖廣源。然其民懷公恩信。賊一動靜。必以告公。故每先事遏其萌。賊終無能爲者。乃躬督版築。上冒氛癘。下涉艱莽。撫士卒疾苦。恤其死亡。閱歲。順州之城成。而公亦病矣。猶日飭將校以守禦計。詔加東上閣門使。因辭之。一夕。大星隕于庭。公曰。吾死于職。得其所矣。無一語及其私。遂卒。實元豐元年十一月十二日也。享年六十四。公資性莊重。篤學能文。尤長于詩。年三十起從軍。善御士。與同甘苦。得其死力。處倉猝若無事。守邊務簡靜。謹斥堠。最不喜疆吏生事。徼功賞。故所至蠻落畏懷。無敢侵竊者。忠義亮直。白首一節。賢士大夫皆譽之。謂古名將無以加。然公以習知嶺粵情僞。人安之也。每滿歲。輒增秩。見留。曾不得內徙。嗚呼。如公之志業。使得馳騁西北。擾服鞭笞。必有軒然可觀者。而終老于一方瘴癘之城。材不得盡其用。此議者之所惜也。有文集十八卷。卒後十年十月。葬于零陵金釜山之原。惟陶氏世家潯陽。靖節先生之後。有避地湖湘者。公之高祖矩。至祁陽。樂其山水而居之。今爲永州人。曾祖獨。祖鈞。贈殿中丞。父岳。以儒學有名。仕

爲尙書職方員外郎。累贈刑部侍郎。初，丁晉公一見公，器賞之。妻以先兄之子，封錢塘縣君。生一子通。早世，取兄之孫同爲通後。爲臨桂縣尉。又卒六女子，其二入亡。其次適邵通，裴彥英，吳括，鄧良臣。朝廷以公勤勞南方，恩錄其遺，皆以異等。四人並補三班奉職。後數年，又以同之子世延爲借職，所以褒勸有功，于是不忘。銘曰。

暨暨陶公，將以儒術。方嚴而仁，敦大而栗。公在軍旅，謀定其微。出奇制勝，釋括于機。公在邊圉，樽俎談笑。民嬉于生，士勁而飽。蠻戴父母，恩信則然。有政九郡，邕至七年。始時邊人，取功以鑿。公不可欺，縮手誰作。釋賊富良，亦何賀爲。落落奇語，人今誦之。惟公之才，兼具文武。施之四夷，霍衛方虎。云何弗契，一生炎荒。瘴谿險微，摧此堂堂。天命在上，人爲在下。雲臺煙閣，彼獨何者。公也不朽，有譽有功。有詩千篇，厥聲無窮。

直龍圖閣蔡君墓誌銘

君諱奕，字如晦，蔡氏。宋人也。曾大父陟，仕爲國子博士，贈太子太傅。大父希言，軍事推官，贈太師。父挺，由樞密副使拜資政殿學士，判南京留司御史臺，贈工部尙書，諡敏肅。母王氏，追封汝南郡夫人。君幼端重，與常兒異。世父故吏部侍郎抗，心奇之，以之爲子，補太廟齋郎。進士及第，除常州無錫縣主簿，以侍親嶺外不赴。丁母張氏夫人憂，服除，守將作監主簿罷，簽書成德軍判官。侍親知秦州，上卽位，遷大理評事通判乾州。服侍郎喪終制，勾當在京步軍糧料院。熙寧三年，詔置審官院主簿，君以薦補。東院西院吏列房，曰關陞，曰磨勘，曰差遣，一官考擬，房相參互，而案牘首尾離異，稽留墜散，至緣爲奸。君乃各析爲三房，隨

官品分屬之人大便。建言門蔭初調試詩。不若試經若律義。爲有補于政。諸路薦舉宜裁。限員數資序。所謂親民者必歷知縣。議皆施行。四年青苗助役法出。選建諸路使者推行之。曰提舉常平倉兼農田水利。差役事。君得湖南。既對語。當上指。遷太子中允。改轉運判官。領其事。是時所置遣多不深惟法意。奉宣或繆。慤君能親行州縣。視人力物地宜。度出而賦之入。公私曰便。明年賚其書來朝。上滋喜。使議司農。無以易君者。遷轉運副使。賜五品服。頗采其議。可通行者下他路。潭邵間所謂上下梅山。其地千里。馬氏以來。獠人據之。號莫獠。國朝有厲禁。制其耕墾出入。然歲久公然冒法。又稍招萃流浪。君曰。省地養此。後日爲大患。今變獠爲漢。無難也。開其會以禍福。使爲士民。口授其田。略爲貸助。使業其生。建邑置吏。使知有政。如此而已。于是面敷其說及區畫之序。上嘉納其策。會今門下侍郎章公惇。察訪本路。卽付其事。同君經之。檄入其境。果大歡。從授冠帶。畫田畝。分保伍。列鄉里。築二邑。隸之。籍其田以畝計者二十四萬。增賦數十萬。遂招懷邵之武岡峒蠻三百餘族。戶數萬。歲輸米以萬計。納其所畜兵仗。以其地建二寨。六年五月。上遣使者勞君。賜名邑曰新化安化。寨曰武陽關峽。遷君太常丞直集賢院。敏肅時在政府。辭其命。手詔不許。又撫納邵徽誠等州鎮蠻族之歸附者。皆以補吏。因言治新民法。宜有張弛。願假臣便宜。詔可。長沙諸邑負茶租田稅。積爲緡錢四萬。請如赦蠲除。議全州不可廢。乞行保甲法以防盜。置錢治衡州。以權物輕泉重之敵。皆從之。敏肅以疾去位。乞還君。君亦以侍郎後有二子矣。數自言。遂歸其宗。八年再任。十二月交趾入寇。徙廣南西路轉運副使。權桂州。經略安撫司事。時賊已陷欽廉邕三州。內地城皆晝闔。吏民

多逃散。君至開門。日會賓僚。棃酒。鎮以暇豫。人恃以安。去者來歸。簡料丁壯。戒期自將擊賊。賊聞不敢內窺。引去。乃請獨復三州。完其傷痍。老弱皆有所養。更軍制之不便者。除械峙糧。以待王師。問罪。遂城邕州。鑿井三十。師至無需不充。時九年九月也。已而隨軍南行。方廣西財力乏。而轉餉流行出境。所支尙足數月。十一月。軍駐思明寨。聞母離陽王夫人喪。去官。其後四十日。班師于富良江。而主將以縱賊無功。猥曰糧乏。坐是奪君太常承直集賢院。未幾。忠愍公徐禧來會軍費。上君狀實。于是朝廷知君爲有勞無罪也。元豐二年。猶監曹州倉米赴軍。丁敏肅喪服除。換通直郎。兵出西鄙。河東餽運不繼。使者皆得罪。上特起君管河東轉運判官事。徑如鄜延會王師。治運事。遠部條前運七失。遂上因糧摺運法。運夫皆以親民官部督。故無遁散。分屯軍還。或扇搖以再出。稍避匿。至聚爲盜。亟出榜開諭。以道安定之。城石州二寨。具舟通道。紆阻以濟。議河外五堡小而密。徒分形勢。有警不足守。可留平時戍望而已。遂大省儲饋。轉運使陳安石入對。上曰。事一委蔡某耶。因屢稱獎。五年十一月。以本官直龍圖閣。權發遣秦州兼都總管經略司事。儲威積粟。休養民力。治綱領。簡節目。而肅于軍政。嚴于治盜。階州及甘谷城蕃部。間出沒窺抄。君授方略諸將。使以奇捕逐。皆懼遁去。聲實隱然。完重一面。州南河匯他水。歲敗比堤。久受其患。君增築大堤。民不聞役。後雨大水。安居無虞。秦人德之。六年閏六月二十二日。晨出黃堂坐僚屬。奄忽感疾。遂卒。中外之人言人才者。莫不失聲痛歎。爲朝廷惜之。君天資沈明。而彊于自修。多識事變。有父之風烈。嘗言天下事無不可爲者。遭上識拔。感發奮厲。于其造爲。省而後釋。物迎所投。節開理解。無迂其間。當煩潰艱劇。跋谿

莽冒暑瘴。皆夙夜祇力。以身臨之。招攜開拓。未嘗張皇勞費。而妥妥就功。享年止四十四。自少慕親側。又四服大喪。計其在事職。裁數年。而其所立如此。外莊峻。若不可卽。而中寬容。與下論事。曲折往返。能聽其盡。事親至孝。與朋友有義。與族姻有愛教。有侍郎二子。所以成就之者。曲有恩意。內外皆與之俱。爲秦州。奏其長潛管勾機宜文字。初登科。與兄昕。天申同歲。敏肅位樞密時。君使湖南。又與兄滕。天申分領三路。漕事。及秦州。實繼侍郎之治。士大夫夸榮之。其配郭氏女。封壽昌縣君。子二男。曰蕃。曰芝。皆承務郎。一女。嫁蔡州西平縣令趙伯通。孫女一人。文集十卷。明年十月七日。葬于應天府宋城縣七里村先塋。太傅之兆。某視君實從母妹之婚。而又女歸其子蕃。故爲之銘曰。

遠矣蔡宗。肇侯自周。以國爲氏。著于陳留。君七世祖。稍從宋邱。遂有顯人。以衍厥流。肅肅秦州。克紹世緒。適時之逢。涵蘊弗茹。天子曰材。濟予時汝。有疇必咨。罔擇夷阻。方盜跳南。輒使自楚。本根西師。往率秦府。士飽于幟。羌攝吾圍。中以誣斥。恬無一語。亦旣昭之。天子之明。以右以陟。肆底其成。車流馬舞。方駕而傾。概乎善惡。不在死生。刻詩竊石。以慰諸冥。

右司郎中李公墓誌銘

宋忠義憂國之臣李公。在仁皇帝時。天下平治。人習靖佚。公固已慨然。論事書屢奏。及由小吏至大官。所歷見四方利弊。輒條上經畫大計。與他有司議。率常公所議可。最以國儲未建爲慮。天下君子小人不辨爲憂。其言懇至。而未始以安危計其身。朝廷一時知公爲有經世才。逮神皇帝擢士。以不次超遷從官。更

帥西北。遇事益發憤。願卒以上書論高坐廢。嗟夫。公之才無不可。尤長于應變。其于治道。自以爲曉然。遭世用事。未大振顯。而落落不偶。至老且死。豈非命歟。初。公爲世父龍圖閣直學士。絃所愛。遺奏以官。而推與其孤弟。其孤弟詣闕上書。下宰相問狀。復官之。又不受。既再辭官。益刻厲好學。中進士第。歷官十八遷。所至必見稱述。在洛川縣。原鄉教大意。條著爲令。屬民讀之。民歎曰。前時令治我以法耳。今令乃幸教我。相戒以無違。安撫使調諸郡稅輸邊。已而返之。盛冬大雪。勞費不能返者。賤直于兼并家。公曰。他州亦吾民也。令過邑。願輸者聽。躬坐庾門。執契以待。數日得粟萬石。使者下其法他縣。在延州。夏人以歲次金帛。後時。移文願毋逾歲暮。詔邊吏牒報從之。公筆改曰。如故事。因奏言。許西夏者不一而足。今聽之。啓僥倖。傷威重。或劾擅改制書。公曰。郡牒非制也。朝廷是公議。而猶坐贖。在三司。會河數決。公上河策百餘事。異時州郡。類以河清卒應他役。歲更闕夫。若客軍代從事。以不習亡溺者。叵計。公請增募河清。立穴占法。遂以不擾平民。請繕治曹村隄防。謂河必決。此後不二年果決。如公言。在廣南。儂智高特納款。而邕守將蕭注玩寇要賞。不以時撫定。公檄注詣府詰責。注自詭以功贖罪。會蠻人申紹泰並邊追亡者。而巡檢使宋士堯擊之。反遇害。注遂爲駭奏。以聞。天子旰食遣使。公馳奏無足憂。願一屬臣。因條上邊計。宜施行十二事。劾注奉使亡狀當斬。注坐再貶官。頗采漢李固議。上宜柳州土丁法。因及他州。自是得勝兵數萬。以時練習。戍卒大減。蠻賈人乘舟貿易。多抵欽廉等州。公陰察疑有奸。戒所在善伺之。公去未幾。交人寇邊。果以舟入。自欽廉。興安有靈渠。自秦以來通漕。歲久石積淺隘。設斗門。十八里至三十六所。命焚石鑿之才。

留十門。舟楫以通。邕州置馬車五百。馬不能夏。多死。芻秣不給。又折取稅米他部。公以地皆險阻。無所事。騎奏罷之。建復置和市場。以懷遠人。實邊廩。募民墾曠土。薈草蒯。疏瘴癘之氣。攝官差。選無法吏。肆爲奸。公第其名。使待除于家。毋輒詣臺。人大便之。方經略府饗士。諜言寇至。公飲自若。中起更衣。自草爲六牒。馳揭境上。已而飲如初。民吏始驚恐。竄匿。羣不逞陰洶洶。公鎮以無事。遂定。賊見勝。亦以公具得其情。遂巡莫敢動。卽日遣貢方物。請命使者至。公弗見。爲草惡具。俾將吏接之。且諭前害士堯罪未治也。紹泰聞之大恐。委巢穴遠去。初。智高平。其子宗旦及黨聚保有火峒。或出入省地尙猥衆。無所屬。前將規討。擊幸賞。賊遂固守。公揣其情。移書諭禍福。皆泣。卽遣其子曰新率孥族三百并酋長六十九人。以地內屬。其後安平州古萬等峒爭効順。公因請以恩拊納。使受命爲國捍蔽。在陝西。詔以班超傳賜之。而公亦雅慕李牧。馬援爲將。故持重總大體。前此重兵。盡屯極塞。寇至。與戰。則方其盛銳。勝未易決。不戰。則內無重勢。以遇其入。公謂本末失其應。且兵惟戰守而已。乃以善守者列塞上要害。悉廢諸小堡。而料善戰者頓內地。爲援。增繕伏羌城。令曰。寇至。守兵深溝高壘。勿與鬪。寇去。戰。兵裹糧襲擊之。軍中熟。公約束。以取勝。威望隱然。建言弓箭手雖土著。而惰于耕。宜倣古屯田法。率百人爲屯。聚一堡。頗立勤惰賞罰之格。使人人加厲自好。則視公戰爲私鬪。計莫此便。王詔旣以招懷邊羌爲事。而其族叛攻渭川堡。射傷守吏。公責詔失計。因進兵掩破之。嘗奉手詔。列攻守方略十餘事。其後朝廷所施。多公計策。大凡公之行事。章章在人耳目者如此。至其遇事明達。灼見理間。危疑繁潰。沛然迎解。無有留處。退而察公聲氣。怡怡如不能。人莫

測也。公貌不逾中人。志尙高甚。前後所上奏。及間召見顧問。多陳天人之際。君臣大節。闕略細故。稽古自漢以下。不道請以進賢退不肖爲宰相考課法。謂古者有命。然後爲士。故士貴。今人自爲士。故士賤。宜倣古先命士而後命官。在官不貴。罰務以信服人。至明而恕。嘗言曰。爲帥有體。立功有時。慎重當如泰山。見幾不俟終日。其將邊大指如此。去官。百姓遮泣不得行。如施子。趨人之急。甚己事。買田數千畝。刊名爲表。給宗族貧乏者。至今號義莊。與廣南轉運判官劉牧友善。牧死後。公論邊事。盡以功歸之。求官其後。又以女妻其幼子。稱薦山東儒者王建中。姜潛。以身下之。皆至召用。杜正獻公范文正公富文忠公。交口薦公。有王佐才。退治居汝陽園池松竹。蕭然有勝概。日與賓友飲酒賦詩。其文章落落。憂思深遠。尤喜章奏。世多傳誦之。蓋晚節雖屢黜。而志不以故少衰。輒忘朝廷。將終。猶語客以大河未塞爲憂。士大夫識不識。皆咨嗟感慨。以不究用公爲朝廷恨。嗚呼。然則所謂命在天者。又奚道哉。公諱師中。字誠之。上世趙人。唐丞相吉甫有孫煇。爲宋州城令。遂家楚邱。自煇七世爲楚邱人。至公徙鄆。爲鄆人。曾祖壽。太子中舍致仕。妣鹿氏。繼妣張氏。福昌清河兩縣太君。祖某。贈吏部尙書。妣朱氏。金城郡太君。考某。贈戶部尙書。妣何氏。繼妣張氏。嘉興清河兩縣太君。公閱閱自并州推官。以龐丞相薦。知鄆州洛川縣事。又薦除太子中允。知延州。郵政興元府。襄城兩縣。改管幹。鄆延路經略機宜事。由太常丞遷博士。通判澶州。繼丁內外艱。除喪。知臨江軍。爲三司渠司幹常公事。拜尙書屯田員外郎。提點廣南西路刑獄。權經略事。就除轉運使。轉度支。丐使郡知濟州。英宗卽位。遷司封祠部郎中。辭疾。提舉兗州仙源縣靈宮太極觀。遂知州事。神宗卽位。轉

度支直史館知鳳翔府。拜天章閣待制。河東郡轉運使。改秦鳳路經略安撫使。知秦州。遷右司郎中。坐與詔意異奪職。降度支知舒州。復右司。歷知洪登齊三州。復待制。天章高陽關路安撫使。知瀛州。應詔上書。貶和州團練副使。本州安置。稍徙單州。復右司郎中。分司南京。再提舉仙源宮觀。遂以疾終。實元豐元年四月七日。享年六十六。夫人王氏。樂安縣君。四男。脩登封縣尉。卒。价左班殿直。備濟州推官。伉將作監主簿。三女。長嫁供奉官宋玠。次許嫁進士劉澤。次幼。孫男三人。公文集三十卷。奏議二十卷。以某年某月日葬于鄆州須城縣某鄉某里。銘曰。

李實顯姓。肇祥自賻。牧君武安。膺尹河南。太尉相唐。德修有子。八世至公。文武是似。仁祖烝哉。感格以言。神考烝哉。願倚于藩。公蓄不窮。仕也孔構。而才屈。于是歸咎。汶山蠟蠟。其水洋洋。委蛻在是。公則不亡。

宮苑使閤門通事舍人王公墓誌銘

公諱易。字悌卿。姓王氏。開封人。曾祖知緒。贈左武衛上將軍。祖繼凝。皇右騏驎使。宜州刺史。贈左監門衛上將軍。父元慶。皇丙殿崇班。贈左武衛大將軍。公乾興初。以祖任。爲三班借職。十五遷官。至宮苑使。其四以泛恩。一以功拜。初巡雍邱。襄邑。河秦州。催綱已有能名。爲麟州兵馬監押。塞上無事。官吏多宴集。公每間起。登樓堞。省防備。或以爲過。公曰。並邊其敢亡警戒乎。康定初。召試策藝。以本官授閤門祇候。爲鄭州原武三縣巡檢。河中府八州都巡檢使。未行。改涇州駐泊。康定中。夏人來寇。與官軍遇于好水川。公逆策成敗。謂宜持重。主者不省。迫使出戰。公以二千人當萬衆。而伏兵起其後。臂面交中流矢。俄休其衆。據小

山身先趣戰。橫戟疾呼。人競致死。敵騎遂卻。多所斬獲。是時大將失律。故公之功不復明。宣撫使忠獻韓公言之。除儀州制勝寨。主知乾寧軍。慶歷末。歲大饑。河決。商胡軍當下流。前無隄防。水暴猥至。環壘幾沒。公親慰恤其人。與同休戚。晝夜督吏卒防塞。約以軍法。既免墊溺。遂奏發粟以哺困餓。濟活甚衆。因起大堤城南。至今賴之。使者言狀。遷西頭供奉官。再任。俄充契丹國信副使。以益利路兵馬都監知利州。皇祐初。廣源儂獠初平。逸其酋智高。或言轉劫雲南。將寇兩川。人大驚譁。公泰如平時。綏輯慰勞。兩路特以安。而密飭所部嚴繕守禦。未幾。文州蕃部王仰東掠邊地。以備素具。民不知警。賊誅。就移河東沿邊安撫。契丹侵爭失地。公詢耆俗。按圖記。得其實。移文核明之。契丹詞屈服。奏弛府州酒禁。用安撫使故相龐公薦。除閣門通事舍人。改河北沿邊安撫。前時疆臣類喜生事。得細故輒張之。徼倖以市功。敵出巨舟數十。往來界河。欲造端爭產。公但授方略將吏。使謹備之。徐遣人諭以利害。遂巡皆引去。以高陽關路鈐轄知冀州。會英廟登極。大錫兵伍。故事三司用未足。率假民以應卒。旁郡有立威將誅豪右。以竭私藏。公能第次其力。隨所甘入之。冀人尤德公。以此也。歲滿歸高陽。又知廣信軍。俄選爲益利路兵馬鈐轄。特遷皇城使。以母長壽太君郭氏高年。並辭之。改定州路。坐前任獄失。移滑州鈐轄。未幾。改知趙州。丁長壽喪。解官卜居衛州。服除。遂不復出仕。元豐四年十月四日。以疾卒于河南澠池縣。令其子冒之官舍。享年七十八。公篤于忠義。而恬和簡重。居官明以燭理。寬以盡下。志在寧人利物而已。不樂爲皎然近名者。故所至人安樂之。尤審知人。凡薦者三百餘員。間聞流言而恥。自訟。竟未嘗有爲累者。諸公前後薦其才者數百人。

博知書史。尤喜莊老。能用其說以自治。至于吐納導引。得養生之妙。晚節閒居。益淡泊。不屑世故。十餘年間。蕭散閭里。自適以享壽考。臨終恬然。無怛化之變。嗚呼。公之所自得者。豈少哉。其可以無憾矣。公娶劉氏。封仁和安吉縣君。先公亡。一子冒也。孫男女七人。遂以卒之明年正月乙酉。葬于衛州共城縣處賢鄉之原。公之爲冀州。某其屬邑令也。于是前葬。冒來請銘。爲之銘曰。

或于功名。鑿取以奇。公在疆場。人無憂危。歷政有惠。所去輒思。不累乎物。廉靖粹夷。保和貴真。以正壽命。後將求公斯文有訂。

忠肅集卷十三

墓誌銘

贈諫議大夫西門公墓誌銘

公諱某。字某。姓西門氏。其先魏令豹。有善政于鄴。歷戰國秦漢。子孫遷散。其譜不敘。公六代祖。自邯鄲以其家避唐亂于滄州之無棣。稍徙棣州之厭次。今爲厭次人。曾祖某。祖某。隱居鄉里。父某。以經行爲鄉人所尊。公皇朝景德中。明法起家萊州司法參軍。再選儀州華亭尉。丁父喪。服除。以勞遷商州商洛縣令。瀛州景城縣令。丁母喪。服除。爲冀州南宮縣令。以疾去官。明道元年某月某日卒于家。享年七十三。公以法進。而寬平毋害。萊守苛深。嘗有強盜。欲寘之死。使高贓估。公閱案請估。依犯時。持議甚堅。會使者在郡。守語先入。交以責公。公益不屈。二囚遂不死。華亭極塞。蕃漢雜居多盜。公部督追胥。教以捕法。賞募惡少。使與出入。致其情。雖劇盜必得之。終公去邑。人無警。商洛有兄弟訟財。引其父爲左。公戚曰。所貴乎人者。爲其有恩也。今何以自別于異類。雖然。豈天性本然哉。利蔽亡之耳。姑歸。推吾言思之。于是相與泣于庭曰。某曹小人。今而後知利心不足以移親愛。實自長官賜之。拜而去。一邑感動。前日之父子異居。若親在別產者。于是皆合。渭水經邑。可溉。而民不知用。公親相地形。率並水居人。爲圩堰溝塍。使之殖稻。教以灌引。

蓄泄之法。刻其法于石。田歲增溉。皆爲沃野。民賴以無飢。景城地卑而素無水防。天聖初大霖雨。公曰。前幸河安流。今萬有一決。吾民其爲魚。乃白州預爲堤。上下諠曰。無故勞民非是。公曰。請三思。遂調夫二萬。橫起大堤二甫半。水已大至。躬晝夜趣成之。邑賴以免。南宮旣疾。或勸以致事。可得鉞官于朝。公曰。病不能事。又意于利。是欺也。亟移告以歸。公資滄茂。其利人之事。出于誠心。故所至有惠政。人愛之。及更代。往往遮馬。久而得去。仕三十年。當官行已。不問人之知不知。所謂通塞。未嘗以經意。徘徊小官。無不足色。其行事雖古所稱循良吏者。不過如此。以子故贈左諫議大夫。初娶王氏。再娶高氏。封渤海縣太君。後公十年卒。子長男傲。次介。累官尙書屯田郎中。及二女並亡。孫曾男女若干人。公沒後若干年。諸孫葬公于某所。爲之銘曰。

有以愛人。有以直己。誠故能化。忠故弗詭。世所觀慕。雖不熠燿。有政積善。施于孫子。刻詩幽宮。令聞曷已。

正議大夫致仕龔公墓誌銘

公諱鼎臣。字輔之。姓龔氏。世爲涪州高苑人。至公改葬其先于鄆。今爲鄆州須城人。曾祖倫。祖凝。皆潛晦不出。考誘衷。鼎州武陵縣令。累贈特進。妣羅氏。穆氏。贈淄川千乘兩郡大君。公實穆夫人出。幼孤自立。擢景祐元年進士第。爲鄆州平陰縣主簿。始至。決田訟之久不決者。疏泄瀦水。得良田數百千頃。調孟州司法參軍。以舉爲泰寧軍節度掌書記。故相梁莊肅公杜正獻公。繼爲州事。皆大愛重薦之。遷祕書省著作佐郎。知萊蕪縣兼治事。前時賦民車運鐵。人大勞費。公至罷之。正獻嘗語江休復曰。龔萊蕪氣和而直。宜

深交之。徙彭州濛陽縣。轉祕書丞。丁母憂。服除。知密州安邱縣。轉太常博士。賜五品服。知渠州。拜尙書屯田員外郎。州故僻陋無學者。公請于朝建廟學。躬率邑子爲生。以時釋奠。退而講說。立課肄之法。人大勸化。始有登科者。郡人繪像事公。召還。編校史館書籍。轉都官。始在萊蕪。大臣薦試館職。以善石介不召。及安邱秩滿。上策二十篇。以賢良方正召試祕閣。又以不合報聞。議者大爲公恨。然朝廷寢知公。遂擢起居舍人。知諫院。公亦感遇自奮。以言任責。搢紳翕然推重。論奏中人鄧保信罪狀。言蘇安靜年未五十。不可爲押班。董淑妃賜諡非是。三司開封請法外斷獄。率直可之。願先付執政參審稟畫。凡大禮赦。請准太平興國詔書。前期下禁約。後有犯不原。以杜指赦爲奸者。宜著爲令。竟國公主與駙馬都尉李瑋忿爭。瑋坐謫外。仁宗臨朝不適。公引睽上九義。勸上少鎮安之。待其疑亡。則志適矣。已而果復和如故。上喜曰。如卿所言。嘗請遣親信近侍。以君臣父子大議。趣諭皇子入侍。尋兼管國子監判登聞檢院。詳定寬恤民力奏。議淮南災。以公體量安撫。蠲逋振貸。全活甚衆。除北朝正旦使。公奏昔契丹犯淄青。祖父母兄弟皆見略。義不忍往。許之。詔後子孫并免焉。俄拜戶部員外郎兼侍御史知雜事。賜三品服。轉吏部禮部郎中。論宗室宜歲試補外官。請汰濫官。銷冗兵。蕃財用。禁奢靡。連劾薛向奸暴。鬻鹽市馬皆罔上。謂昭陵宜儉葬。景靈神御殿不宜增修。以稱先帝意。屢請英宗延訪臣下。親決政事。上疏勸皇太后捲簾還政。是皆人所難言者。蓋公前後在言路。闊略細故。至大事無顧忌。必言之。其言優游。不亟不緩。平心據理。務使人主易聽而已。恥爲表表。買直近名。退亦未嘗以語人。故其事多施行。而世頗不知自公發也。改集賢殿修撰。知應

天府兼南京留守。徙江寧府轉戶部。召還判太常寺兼禮儀事。判吏部流內銓。選人得官待班謝辭。率留滯。公奏易爲門謝辭。至今便之。其後議明堂配享。及王丞相荆公坐講事。益不合。求補外。以知兗州。是時遣使方田。其法物色土宜爲十等。以均地稅。而使者所辟置意倖功賞。田旣不得其實。而概取稅之虛名。詭額及常所蠲者。加入舊籍。切制州縣。上下騷然。公曰。稅有重輕。均固可爾。今增之。非朝廷本指也。獨不肯增。人危公。公卒。以州籍常數均定。兗人至今德公。或論公八年不遷官。特改吏部。又求閒地。提舉西京崇福宮。魏國公忠獻韓公曰。端良之人。皆喜靜處。龔君心不營祿。祿亦不及。秩滿再判太常寺。再留守南京。轉太常少卿。陞辭神宗。願語移時。喜甚。曰。人言卿德而精明如此。行用卿矣。公頓首謝。時河決曹村。流民無所屬。殍死道路。公勞來賑拊。歸者不可計。使者奏狀。拜諫議大夫。京東東路安撫使。知青州。又遭北方歲饑。活流餓視。南京滋多。官制行改。大中大夫。請老。提舉亳州太清宮。今上卽位。轉通議大夫。遂以正議大夫致仕。公道學文義。內外絕美。事上應物。一以不欺。及退居里舍。著書講誦。澹然自樂。門生弟子造請質問。從容相對。日以爲常。鄉人有善。孜孜稱述。惟恐不聞。其有不善。則召而告之。矜感見于顏色。其人至感泣自新。以是鄉里無貴賤。少長歸心焉。公好學出于天性。旣以經行顯名朝廷。雖有任用。洩劇煩。亦未嘗輒廢書。至老學益深。行益粹。可謂一德有始卒者。元祐元年十二月二十七日。以壽終。享年七十七。兩夫人。李氏。都官郎中之女。追封贊皇郡君。某氏。光祿卿希仲女。長樂郡君。子十一人。男祥權。濰州昌邑縣令。先亡。羣開封府考城縣主簿。義林州錄事參軍。女嫁宣義郎張仲适。殿直張景山。餘早卒。孫男女十

五人公有東原集五十卷。諫草三卷。周易補注三卷。中說注十卷。編年官制圖各一卷。某少以諸生從公學。又以應天府官在公幕下。公之見知甚厚。而諸孤出公遺命來請銘。將以二年三月二十一日葬公。須城之登賢鄉。特進公之兆次。義其可以辭乎。爲之銘曰。

侃侃龔公。令德之世。光祿耆老。水衡循吏。公言正直。皇則好之。糾繩左右。是是非非。以天行止。疇尼吾志。歸善一鄉。士知法義。魯兩先生。徂徠泰山。門人達者。公得其傳。惟深斯水。惟厚斯岡。凡我鄉人。敬公之藏。

朝奉大夫致仕梁公墓誌銘

君諱師孟。字醕之。菑川人。曾大父昭懿。大父邈。試祕書省校書郎。父肅。大理寺丞。贈中大夫。有惠政于閩。閩人思之。至今生兒有以梁爲名者。君方童時。吳文肅公一見奇其秀穎。使爲詩。頃刻輒成。大異之。年十八。冠鄉舉。名聲籍甚。諸老先生喜爲推引。嘉祐二年。擢進士第。調沂州費縣主簿。遷邢州龍岡縣令。丁母憂。起爲相州湯陰令。文肅薦其才。擢國子監直講。熙寧二年。改祕書省著作佐郎。太學策諸生。有對語病新法。在高第者。大臣怒。盡出學官補外。君簽書淮南節度判官事。轉祕書丞。太常博士。元豐改官制。換承議郎。通判隰州。賜緋服。轉朝奉郎。今上卽位。恩選朝散郎。遂致仕。以子登朝。經兩郊恩。爲朝奉大夫。階護軍。元祐六年十月十八日。以疾終。壽七十二。君彊毅篤實。少刻勵于學。老不輒廢。博知古今論議。以忠義爲主。其文詞雄深。有氣樂善疾惡。出其天資。視世事有弗可于意者。感嗟痛歎。至或流涕。不能浮湛俯仰。故與世齟齬。而世亦卒不得君用。雖有窮塞。恥以一毫近人。居京師七年。未嘗造請。初。天下轉運司辟置。

管勾文字官。河北以君名聞。于格不應。詔特從之。而當路者亦頗欲因是近君。君不願也。其後中執法有聞君之名。欲一見之。薦以爲屬者。朋友更勸往見。君曰。士而自鬻。何義也。卒不往。方時天子慨然求治。更造法令。拔蒐人才。宰相大進退。天下士士皆奮待。同爭前恐後。君獨顧慮。逡巡依流隊牒。錄錄以老。暨二聖在御。振用淹滯。而知君者六七要人。皆同時在顯處。爭欲薦用之。或抵書勉其出。人亦謂君且得志無疑。而君笑曰。吾與世不諧老矣。此而進。是持平生爲今日資也。亟謝事而去。時年六十四。于是識者知君非苟爲異。以取高當世者。晚節居鄉里。自號般陽居士。觀書賦詩。蕭散自得。鄉人親敬之。前夫人李氏。資氏。故尚書都官郎中丁職方司員外郎緘之女。追封真定中都縣君。今夫人仙源縣君王氏。比部員外郎孝和之女。子三男。先朝奉郎充青州臨淄縣尉。允舉進士。二女。嫁隰州永和主簿董昱。沂州司理參軍李翔。孫男女六人。文集二十卷。卒之明年十一月十七日。葬于萬年鄉零召村之原。二夫人祔。予故善君也。先于是來請銘。爲之銘曰。

嗚呼梁君。學無所不知也。行無所不修也。謂無心于世乎。服膺降色。其見善也。按手齟齬。其聞惡也。謂有心于仕乎。不撓乎上。未老而歸也。嗚呼。士之于世。合則從。不合則去。進退之正也。然是猶爲在人者也。乃若時可以行而自止。招之以道而不來。非在我者重。蓋不能也。嗚呼梁君。剛不屈者也。能行其志者也。

侍御史黃君墓誌銘

君諱照。字晦甫。曾祖餘慶。祖深。皆不仕。考禰。贈尚書職方員外郎。黃氏。世家長沙益陽縣。其後徙江陵。今

爲郡人。君登慶歷六年進士第。除歸州司理參軍。移岳州華容縣令。至之日。遭歲大饑。亟諭富人出米。繼發官廩以哺流餓。蓋活人以萬計。邑西有田數千百頃。皆腴田也。而夏燥秋潦。民棄不耕。君築堤置門。以時啓閉之。遂常爲豐歲。楚俗死者焚而委其骨于野。君爲訪諭使收瘞。至輟俸以濟之。小吏敏秀可教者。授以經業。多至成士。民之輸賦于府者。有洞庭之阻。回險淹費。君請受之于縣。于是上疑下誅。而君亦自信不易。其後遂以著令。改著作佐郎。知道州江華縣事。靖民成物。益用愷悌。以祕書丞通判桂州。遷太常博士。嘉祐六年。詔遣使人分行天下。以寬民力。而君當使廣南。受命明日。卽行。奏獨僞劉以來丁米。民始不以多男爲患。父子始不以避重就輕相去。廣州增外城。人驚不寧。君疏曰。無故起大役。非所以綏邊。且城議有三。臣請詰之。其欲依海者。海旁之地不能尺。則及泉矣。欲撤室廬者。城本以保衆。而顧可先毀其居。欲卽于城東。劉氏故城者。其城荒陋多瘴氣。豈使民之意。皆非是。詔爲罷其役。朝廷第使者之狀。君爲諸路最。英宗卽位。拜尙書員外郎。故唐質肅公辟從太原機宜。府改都官。福建轉運判官。治平三年。用今參知政事王公珪。馮公京。致政范公鎮。故侍郎彭公思永。前後薦。召以爲侍御史。行次衢州。五月二十六日。以疾終。享年五十四。君性端敏。治身立事。皎皎不妄。以才遭時。其小者。略已有試。而已能如此。其大者。朝廷方將聞之。世方待其有軒然可觀者。而君旣亡矣。豈非所謂命歟。疾革。猶扶力占疏。以極論當世事。嗚呼。斯可以見其志焉爾。仕二十年。不爲私計。賙族人之孤寡。不能娶嫁者十餘人。好文嗜詩。類數百篇。曰漫爲集。初娶陸氏。再娶王氏。封德安縣君。子六男。友端。友聞。友顏。友益。友諒。友直。皆舉進士。一女歸殿。

直柳棨某先人嘗從政于江華。後二十年而君至。事經先人所畫者。一皆循用。吏民莫不以便。安德君而至今。歌思之。有前劉後黃之語。今上熙寧四年。友端使來乞銘。遂以七年十二月初九日葬君江陵縣龍山鄉水青里。銘曰。

士難者才。時或不以。二物之會。十百一爾。亦既有之。亦又遽止。方驅而顛。胡自不俟。嗚乎艱哉。誰詰斯理。刻詩幽宮。以慰千祀。

職方員外郎李君墓誌銘

君諱樞。字應機。咸平四年進士及第。除蜀州推官。逾年丁父憂。服除。再爲〔案〕原本缺州推官。真宗東封。君督治道。視他州爲謹辦。車駕過有褒言。因詔使扈從。及還京師。特改大理寺丞。又五遷爲尙書職方員外郎。歷知越州。蕭山縣。滑州。韋城縣。用舉者監在京百萬倉。坐不謹。火禁謫。監真定府酒稅。通判鄆州。知雅州。以天聖五年十二月十七日卒于官。享年三十八。祥符景德間。四方爭奏瑞物被賞。蕭山芝生縣庭。吏民謹夸願以聞。君曰。吾方嫉世之因緣僞欺以徼倖者。願忍自爲哉。因謝止之。方是時。宰相晉國丁公權傾天下。雅知君。嘗薦其才。數欲提之。皆遂巡以故引避。其後所附者。多得罪譴。嗚呼。臨義利。視禍福。不以動其心。而不失其所擇。非明識信道。疇克卓立有是哉。君之配張氏。封清河縣君。鄭氏。滎陽縣君。六男子。曰察。曰字。曰寘。曰實。曰寅。察舒州望江令。寅舉進士。授河南府助教。四子皆服儒。五女嫁士人。其六子亡者五人矣。君卒後五十九年。當元祐之丙寅。寅始克葬君于鄆州須城縣登庸鄉之原。實閏二月。

十有四日壬寅也。李氏上世爲趙郡著姓。考其譜緒。蓋趙之廣武君後也。仕唐末爲殿中丞。曰稹者。子君爲曾祖。殿中生廷韞。任石州刺史。石州生君之。考曰戩。贈尙書刑部侍郎。自五代之亂。遷徙居鄆。今爲鄆人。銘曰。仕不顯。志則彊。壽雖嗇。名不亡。歸矣新阡。萬世之藏。

兵部員外郎直史館梁公墓誌銘

公諱蓀。字夢符。姓梁氏。其先襄陽人。曾祖諱處厚。以高貴雄鄉里。好義致客。賢士大夫多賓友之。祖諱湛。并州錄事參軍。考諱錫。巴州軍事推官。贈職方郎中。妣沈氏。仙源縣太君。公天聖五年。以名進士起爲博州軍事推官。守貪政不善。公告以理。又告以禍福。皆不用。後守果敗。再調鼎州團練推官。江上夜覆舟。提家人投舍民家。明日。主人出百金爲公裝。卒不取。至自裂衫裹赤兒懷去。緣牒旁州還。偶重獄將決。覆之有疑。亟白州爲上其狀。得不死。與司理參軍雍規考同滿。皆缺一薦者。使者薦公。公曰。規同年進士。而其母老。願先規。以故復爲武勝軍節度推官。秩滿改著作佐郎。知河南府長水縣。取豪猾一人抵法。邑大安治。慶歷中。契丹每入邊。以選通判雍州事。守者欲大新城櫓。賦之民。公曰。乃先擾吾人乎。持不可。未幾。契丹泛使至。用故事以通判護其行。素狂嫚難肅。以公體制嚴重。皆帖帖進止。無輒敢譁。已而徐示以恩。因盡得敵所以遣使指。飛奏之。接伴者旣交使。是夕其衆遂大肆。從有司需索百端。郡邑困之。皆服公以爲不可及。敵使入朝。進其國書。仁宗顧宰相曰。一如梁某言。使愕。并閉所欲言。不敢發。徐曰。小臣妄刺臣國。

事。于是言者以雄州用通判非是。而接伴使後不戢。敵恚公形已。亦曰不當先入其私所問。朝廷規安其心。乃徙其守滄州。公德州。改祕書丞。居數月。通判大名府。程文簡公琳方居尹。與轉運使張公昱之以氣權相睨不安。以公張所辟。疑陰爲其用。公以誠心事二人。無所左右。循事議理。是非必盡。久之通其所闕。二人卒相歡。以公爲長者。騎士缺馬。久或匿名以書告反狀。文簡驚莫能如何。公曰。是不足慮。小人意在馬爾。退如平時。稍因事籍馬盡補之。果無事。用安撫轉運使。薦知深州。遷太常博士。知雜事。御史言公才堪御史。上曰。是嘗接蕭階者。吾知之矣。階前日契丹使者。卽召爲監察御史。中外以爲得人。俄出使制獄。以疾力請補外。知磁州。是時兵臨貝州。調發聲援。每先期會。優詔褒之。前此在大名。轉運使以冀州妖人李生獄。屬公。李生旣前死。獨刑其餘有差。號稱詳平。至是李氏怒。怨生父覃。妄言生不死。有中人故仇轉運使。頗居中訐其事。遂付御史獄。鈞按雖力。卒不能變。然皆以吏議挂之。宰相畫特旨奪官。同列奏留。以爲太重。中丞翰林亦更爲論辨。猶貶秩祕書丞。監衡州稅。未赴。改唐州。頃之復爲博士。通判汝州。移襄州。皇祐祀明堂恩。拜尙書屯田員外郎。復以殿中侍御史召。時議開六塔以行大河。公言騷民逆水。非徒無益。且有後患。卒如公言。奏罷張堯佐宣徽等使。唐質肅公介以言事貶嶺南。隨以中使。公言陛下愛介。故遣護之。不幸介以疾死。天下後世能無以殺疑乎。上曰。誠不思此。亟爲還中使。改三司度支判官。又判開折司。出爲京東轉運使。前時類進羨贏蒙遷。以故東方財屈。公言民困敵不可浚。願戒諸路毋得進羨財。凡三司橫有取。輒還其檄。因蝗災。請以米募人。鑿取其種地中。對以斗斛。其孽旣易殄。而方冬春艱食。又

可以補民。其後遂著爲令。州郡所饋一切不取。轉侍御史還臺。請裁任子令。謂當自宰相始。俄乞解言責。改刑部員外郎直史館。知襄州。賜三品服。徙邢州。轉兵部。嘉祐四年五月十三日以疾卒。州之正寢享年七十。公性孝悌。數歲失母。職方公再室趙氏柴氏。公事之皆以謹順聞。而兩夫人尤篤愛公。凡親疾無晝夜侍側。醫雖遠必徒步自致之。後繼居喪。哀疚毀棘。有以過之。學問本六經。于文章喜司馬遷班固。其落筆必雍容渾灑。有作者風。致爲名輩所推。居官以鋤強梗養善良爲政。其敏發以靜下。不見其所以爲而吏莫得動。故所至民惜其去。遮哭不得行。去久猶思之。更御史三院。彈劾無所顧望。奸權斂懼。朝廷爲尊嚴。其言順不迎上。直不媚世。皆出天下公議。猶喜論人物。每對從容指別善惡。所常用不用。未嘗以小是非名目十大夫。故其言多見行。而世或未有深知者也。夫人劉氏魯人。封壽安縣君。勤儉仁愛。治家有禮法。與公同寒苦。至進顯無慍喜色。後公二年十二月一日年六十六以終。六男子。燾殿中丞集賢校理。餘早世。五女子。適鞏堂張景真。范遵道。張伯卿。席延年。孫男女若干。初公愛鄆將徙居之。于是燾卜熙寧十年。舉公夫人之喪。以八月某日葬于須城縣某鄉之原。銘曰。

梁公侃侃常厥德。踐取幽渺如今昔。有韉其文爛雕織。有邕其鳴表羣翼。克施有政審則釋。物物迎刃莫吾逆。蒐拔良禾善使殖。濟明以恕民不亟。儀曹御史治百辟。有或設側毅以聖。臧謀良言帝嘉得。緩而不迂切不迫。視大義利正趨擇。進斯有禮退以色。妥妥陞級循寸尺。終民莫得被大澤。孝子作龜沒之北。泉深壤厚惟墨食。公燕順祥兆幽宅。詩以詔之罔窮極。

屯田員外郎蔡君墓誌銘

君諱天球。字粹夫。世爲宋人。曾祖贈太子太保諱陟。祖贈尙書祠部員外郎諱希顏。考尙書屯田員外郎贈都官郎中諱極。妣萬年縣君季氏。君慶歷六年進士及第。爲宿州觀察推官。會歲荒民飢。詔所在選官賑哺。君所活數十萬人。以功補近地。爲澶州節度推官。數以義理劾正其上官。無小大不直。不已。有能名。丁父喪。服除。調亳州觀察推官。時陳恭公罷宰相判州事。巖嶮少所與。獨善君。薦其才可用。又請越常次改官。許之矣。俄丁母喪。服除。改祕書省著作佐郎。監杭州樓店務。英宗卽位。遷省丞。知蒙州。不鄙其民。爲立學校。開以教化。人人嚮勸。轉太常博士。今上卽位。拜尙書屯田員外郎。通判乾州。轉都官。熙寧二年九月二十日。以疾卒。享年四十五。夫人張氏。故天章閣待制晁之子。封長安縣君。九男子。皆先君。天一女。嫁橫海軍節度推官凌浩。始君學于徂徠先生石介。年雖少。已卓卓有聞。于吏治敏以達。在蒙州。躬考覈版籍。得隱稅積錢至百萬。監司言狀請賞君。君曰。是固不足言功。誠因此得推法天下。庶乎爲有補爾。代還。又上書言二廣荒遐。州縣蓋有不足置者。勞敝遠民。而公私亡所利。議者方愛虛名。甘實患。非是未幾。詔諸路併廢州縣。以寬役省費。而三司亦置帳司。列賞罰。以專鈞會矣。由是以觀君。足以知其欲有所爲。而其智能宜可以爲今日用。方天下興治。以因任爲事。君之從父。旣以勳業進樞府。或在侍從諸子弟。又與士大夫爭奮其材。以赴功名。人樂道其盛。而君于是時。獨不少待。嗟夫。其命之不相謀也。初。仲弟析產。君不取。以與其兄之孤。以故貧。而父兄猶在殯。每日廉約。營積調度。方將及葬而亡。亡且無子。嗟夫。君志

之不就多矣。其可哀也。于是以十年五月二十三日。并舉君葬于宋城縣三陵村先塋之北。實其夫人經治之所。著易論十卷。孝經二卷。雜文詩百餘。銘曰。

有輝其實。亦厚我期。坦坦以御。執債其馳。不在其身。或以承之。云胡善澤。斬焉莫詒。萬世共盡。夫亦奚悲。冥冥可作。慰以銘詩。

刑部詳覆官朱君墓誌銘

君諱述。字傳道。姓朱氏。其譜曰。七世祖端生。鄂岳巡官。頤生。尚書戶部郎中。起生。比部郎中。祕生。君曾祖江陵府當陽尉葆光。贈兵部郎中。當陽生翰林學士昂。仕真宗爲名臣。贈吏部尚書。翰林生。虞部郎中正。蕃。贈兵部侍郎。君。虞部第四子也。初以廕補太廟齋郎。皇祐元年。舉進士。中甲科。除荆南節度推官。避親嫌。換鄂州觀察推官。丁母夫人駱氏喪。服除。調并州推官。安撫使故相龐公辟。掌機密文書。後徙定州。以疾免。復用。大臣辟爲大名府推官。俄召爲刑部詳覆官。治平二年五月十四日。年三十五。卒于京師。君九歲卽喪其父。哀慕如成人。家故大族。君雖幼。而于屬尊。每時節。當諸姪慶拜。能各爲禮意。以接之。有年長數倍者。立其前。不敢懈。性高明。疏達。儀貌秀揚。篤志于學。好論議。讀書不從世人蹊徑。務求其精微。至于自得之。而後已。故其疾革。神奪矣。猶能誦其書累日。至有終篇無差者。與人交。有情文。而不失于正。視世故。若不足以經意。察其事。至而應之者。每當其理。尚氣節。臨利義。知所擇。族人買婢。有攜稚子求并售者。君疑以詰。至再四。曰。實藥氏華亭尉高陟妻子也。夫亡。無以朝夕。忍此以苟生。君戚曰。陟雖不識。

而吾同年得科名者也。亟命留之。爲具其嫁。家人發空囊笑示君。君曰。有竭吾力而已。至質其帶。銀得銀數兩。及褫家人服物。既而今。參知政事馮公。故翰林學士沈公。皆同年。相與義之。助以錢。遂濟其行。龐公去定州。代者武人不善君。故謝病以歸。僚友更諫之不肯留。或謂數日考滿當改官。君曰。以此易吾心。是謂屈身以徇物。豈所謂義哉。既去。貧久困甚。而處之自如。其配王氏。故相沂國公之從孫。有賢行。生一子脩平。熙寧七年。君兄之子提點湖南刑獄。太常博士集賢校理。初平謂某曰。吾少孤。所以教之學。視以爲休戚。而終始成就之者。實吾叔父之德。常懼無以報稱。將以今九月某日葬于龍山鄉某里之原。子其爲之銘。某嘗游趙魏間。又從事江陵。得君始末。士于生死蓋不足道。獨悲君質良材完。所以修爲厲飾之。又如是。天生之宜。若有意者。然不少寬其年。使有見于世而死之速。何謂也。當然而不然。不當然而或然。古聖賢以爲命也。朱氏上世。有仕唐爲治書御史者。家京兆之萬年。昭宗末避亂。其族南徙。自翰林顯于本朝。而卒葬江陵。今爲江陵人。君能詩。清麗有思致。集賢君搜類之。得百餘篇。行于世。銘曰。

學明志傑。才揭揭兮。蕤蕤其秀。裹以發兮。不畀以實。遇執齋兮。詩遺于後。慰幽穴兮。

贈朝請郎楊君墓誌銘

京東轉運副使左朝請郎楊君康國。狀其先君平生。持以來請曰。楊氏魏人。世澹泊隱居。大父以行義教其五子。鄉黨皆稱爲善士。嘗語人曰。吾之業所成就。孰與金貨多哉。先人實中子。事父母。接兄弟。以孝友聞。既孤。捐其家所有。以委兄弟。一毫無取出。讀三墳書。得所謂養生治病之學。精通而善用之。喜曰。此古

聖賢事也。樂以其術濟人，多有功。性仁好施，侈于賙人而嗇于自奉。有貸取弗償，輒折券不問。鄉人益以爲長者，敬而賴之。以大父所以教子者教諸子，而康國遂得由進士竊祿以奉榮養。熙寧十年，天子親郊，以恩封大理評事致仕。其後侍奉衛州，以壽終于康國官舍。實元豐七年七月十七日也。享年七十三。康國旣免喪，奉母氏壽安縣太君呂夫人復出就祿。追惟先人啓手足之時，語諸子曰：「鄉里今並河可虞，吾子衛也，甚樂其土風。瞑目後，其歸我此地。」康國奉治命，卜衛之共城縣楊呂館某鄉之原，將以元祐八年四月日奉大事。康國由貧賤輟耕讀書，豈自致及此。實先人種德所貽，惟先人之德弗顯于生矣。冀不泯于後者，顧不在君子之言以銘其藏乎？敢以請。嗟夫！士之立于朝廷者，類得以天子之爵歸榮其親，非特以慰其爲子之心，而天下之爲父母者勸矣。惟君子于爲善，陰德所儲，雖弗振耀于世，然教子之功，卒獲其報而身享之，晦之有顯，茲孰加焉！今其子由御史諫官出，奉使指議論政事，爲朝廷聞人。孫曾蕃衍，以學爲業。巖巖有立，則楊氏之顯可以勸者，滋未艾也。于是不可以不銘。君諱整，累贈左朝請郎，父諱懷德。康國君仲子，康元，康民，與幼皆亡。孫男十六人，挺三班借職，餘舉進士。女六人，曾孫六男十二女。銘曰：

共山淇水，土厚俗媿。人擇其生，我擇其死。志則無違，惟是有子。善非期報，要毋怠止。

承務郎李君墓誌銘

天章閣待制李公有高才大志，仕先帝時嘗顯矣。晚坐言事再奪職，死謫中。吾誌其墓曰：「公才無不可，尤長于應變。其于治道，自謂曉然，所以深哀其旣遭世而不合以死者也。沒後十年，其子上書闕下，追訟其

忠章至十數。朝廷矜之。詔復以待制告第其子。卽君也。君名伉。字常武。見其父志不就退廢。則竭力家事。疏園沼。植花木。究所以爲親娛者。母王夫人抱沈疾。服勤侍藥。衣不解者歷年。前後持喪。盡禮無違。君旣以名臣子篤于忠孝。而所上書文義。怛惻益知名矣。然澹于榮利。雅無仕進意。幼以父任得官。逾四十歲。家日貧。乃始起調單州監酒。從辟改鄆州。再歲以疾卒。元祐八年五月三日也。年四十六。妻孫氏。二子舉進士。曰周南。登科爲魚臺縣主簿。曰召南。一女一孫尙幼。君好學博記誦。于書通大原。不從舉子畦徑。生不見喜慍。接人無厚薄。中所識判然。風韻閒遠。嗜好古雅。學鼓琴。書字精于隸。有法。尤工爲詩。取離騷陶謝古體師之。有集十卷。先進長老及其父時賓客。咸與之交。女兄嫁宋玠。玠戰死。家寓鄆州。躬往力致之。歸。朝廷錄玠後及異姓。玠家以周南列奏中。推恩旣下。君辭不受也。兄偁死。官太原。又疾馳護喪歸葬。哀感道路。治家妥妥有法。善于兄弟。嚴事寡嫂。嫁妹及兄之子數人。喜賙貧厄。卽以八月一日葬于鄆州平陰之先原。初。吾臨其喪。二子伏曰。先人受知厚。願得銘詩以終賜。哭甚哀。無以辭也。惟君嘗有言曰。爲善行已。士之道當然也。世之有作以近名。惟恐不皎然者。竊嘗惡之。然則凡今所書。在君志皆爲不足道。念不書無以示後。而慰其子也。餘所當詳。見天章公墓刻云。銘曰。

清海軍推官呂君墓誌銘

治平中。子從事江陵。僚友呂尹者。君子人也。日羣居幕府。人以君寡言不表飾。多易君。君退然坐自如。獨

予察君非苟然者。居久之。與人益有意。事不諱而治。吏抱文書次至。君則摘閱反覆。小謾必得之。府無失政。多君是賴。人乃大親服。而與予相好。至三年先後歿。滿蓋無異。初相從事也。後十八年。君之子仲敏抵書于予。言先人捐館。貧不克葬。今始卜葬。惟壙中之文。敢敬以請。昔者雅多君行義。今嘉其子之能大事。乃論次其終始。按君諱昌辰。字伯熙。起居郎龜圖之曾孫。宰相蒙正之孫。光祿少卿務簡之子。以世父廕調和州。歷陽漢州。雒縣兩主簿。徙江寧。建寧令。父喪不之官。服除。調萊州推官。以舉者死不得磨勘。遷荆南推官。又補商州。坐州將累免。以山南東道推官知金州石泉縣。改清海軍推官。知桂州修仁縣。某年某月日以疾卒。年六十一。君生長貴家。而廉約刻苦甚。寒士性靜慎好學。無競其中。善之惡之不可欺。從公謹繩墨。不爲皎皎。吏民宜之。上官應謁則往謁。不肯間見。無意于人之知不知。家極貧。不以一毫取人。人亦不可干以私。死也至無以斂。蓋其節如此。夫人劉氏繼卒。子男六人。仲敏今爲通直郎知鄆州陽穀縣。仲履仲棐舉進士第。餘早死。女一人。以某年月日葬某所。銘曰。

不知而慍。以得爲賢。人無異趣。君獨不然。以節自終。遺子清白。君子無憾。歸此安宅。

忠肅集卷十四

墓誌銘

潛山黃先生墓誌銘

先生諱孝綽字公裕姓黃氏。上世爲建之浦城人。自其考徙居于舒州之太湖。今爲太湖人。舒之望曰潛山。其下號丹霞府。蓋養仙之所棲。幽人有道之所潛。先生遊而樂焉。因自號潛山叟。而舒人尊之曰先生。先生者。道德之號也。先生于孝弟有至性。事父母竭力至誠。而時察其色。辭以爲憂喜。能如古人所謂養志者。侍疾居喪。皆有以過人家。貧口衆而制之必均。養嫁諸孤女。過己之子。周人之窮。不計有無。往往衣不兼食。不屬。而先生處之自如。居鄉與人子言必以孝。與人弟言必以順。所居人用化之。至相詔語曰。毋或作非。使黃先生知也。其子莘居官。每歸省。必問今日治事何如。使條其狀。聞其當于義理。則歉然爲之飲酒。常謂曰。吾所以不仕者。爲有子仕。足以行吾志。汝視義利是非。可不慎所蹈歟。先生少舉進士。兩至禮部。遂不應。其後天子推恩。當特奏名。而先生亦不復起也。士之不仕。蓋有之矣。或厭濁以遠引。或異學以離世。或求焉而不得。既去而徜徉。黷嗟。超脫禮法。誦誕宕之言。以爲歸。如先生皆不然。仕之志。以其子行之。仕之道。以其身行之。恭順于父母兄弟。行誼信于鄉黨朋友。以爲是足。以盡吾職。而恂恂于名教。不

知仕不仕之異。非孔子所謂孝乎。惟孝友于兄弟。是亦爲政者歟。嗚呼。先生可謂純厚知德君子也。熙寧三年二月十日卒。享年七十四。曾祖郾。祖元吉。嘗仕江南李氏。非其好去之。有詩名。後贈大理丞。考覺。任殿中丞。仕以清直聞。詩益有名。翰林楊文公。劉子儀。章郇公。宋宣獻公。皆稱之。多與之唱和。先生遂世其家。尤善書。其法本二王。顏柳。其配裴氏。屯田員外郎求己之女。有賢行。後二年亦卒。子五男。莘著作佐郎。勤。藝。荀。蘧。皆服儒。能如先生教。一女。歸國子博士張慎言。早卒。六年。著作君以書謂予曰。黃氏世以仕貧。自莘祖不克歸閩而葬太湖。今莘又以仕來北方。川路岨遠。不孝不敢以柩行。于是卜之地。得鄆州須城望山。而日得十二月之壬申吉。將合葬焉。幸畀之銘。某久與著作君游。而未及見先生也。然觀其子之賢。則先生可知也已。于是論次而爲之銘曰。

孝哉先生。德成諸身。施于其家。及其鄉人。所性在是。進退兩忘。以至于命。曰壽而康。汶水北原。安此新宮。刻詩幽石。以昭無窮。

朝奉郎致仕黃君慕誌銘

君諱莘。字任道。姓黃氏。自少奇穎。有器識。以文行知名一時。皇祐五年。登進士第。爲揚州天長主簿。徙恩州清河令。前時黃河在州境。而縣並河。歲輸芻茭。後河去猶賦之。至是積逋十四萬于數十貧戶。都水督責鞭笞不已。六年無可入。君條列于朝。悉蠲之。時遣使寬恤民力。欲一切罷河北驛傳之須于民者。君言。騷民故常禁。而事繫國信往來者。亦何得廢。獨可具民所勞費。以其數當稅役。朝廷行之。至今公私爲便。

使者吏卒過境。小有齎緣爲擾。必按以法。歲饑。部使者不肯賑。遂發寧化鎮倉。人賴以活。秩滿。改祕書省著作佐郎。知曹州濟陰縣事。神宗卽位。遷祕書丞。廣濟河決勢感。乃詢邑人。議破南堤以分水。水去病鄰邑。君曰。此于法甚重。其可以累他人。亟自劾。韓魏忠獻公吳正憲公暨御史臺吏有論掇。知冤句縣事。張復禮至。請納官以贖之。朝廷亦嘉君意。止奪一官。免邑人綸君事之。魏公留守北都。薦教授國子監。丁內外艱。服除。復前官。直進奏院。召對。上猶以濟陰事獎勞之。除提舉河北常平倉。改東路轉運判官。徙西路。水沴穀貴。奏罷市易司。增價以糴。免民艱食。繼又賑之。遂無轉流。遷陝西提點刑獄。劾部員外郎汲逢坐市易事。繫秦州詔獄。逮三百人。久未決。主者幸有功。慘覈巧詆。先給移逢病于州。君方攝事。亟遣醫。得逢無恙狀。乃檄問所以爲不實者。主者情見趣竟。獄不敢小出入。逢得無冤坐。輕詣君位謝曰。獲更生。實君賜也。官制行。換階奉議郎。召入尙書省爲職方員外郎。轉承議。賜緋衣銀魚。久之求補外。知汝州。元豐八年。今上嗣位。遷朝奉郎。以足疾請致仕。十二月四日卒于州舍。享年六十五。前娶皇甫氏。追封永安縣君。後章氏。封武寧縣君子三。材婺源主簿。樞睦州司法參軍。杞興化主簿。女二。長適朝奉郎王績。次進士蔡居厚。君事親至孝。友愛諸弟。與人交有終始。性諒直。勇于爲義。而廉于進取。臨事不惑。所謂禍福利害不以動其心。聞人善。喜切切稱道。其不善亦不能隱。必面告之使改。常謂天下大分。惟是非黑白爾。要不可使淆。見小不明。則咄嗟憤歎。其爲治。做此。故所至大有聲。而亦或以不得于人。政事本于仁厚愛民。爲監司不事邊幅。未嘗置人于法。布衣時聞舒州望江令豐有孚能吏。以誣繫獄。卽馳見轉運使王素白其冤。

素立釋之。君故不識有孚。有孚亦不知也。晚年益喜論事。憂深思遠。過于在位者。嘗上疏論免役錢不當及下戶。大臣不禁賓謁。與人語簡雅。有風致。文章豪健。潔齊源遠。而氣正。有集四十卷。藏于家。曾祖元吉。仕江南。祖覺。仕皇朝爲殿中丞。父孝綽。號潛山先生。以君仕于朝。贈朝奉郎。元祐八年十月辛酉。葬君于鄆州須城之望山。其父墓次。某識君三十餘年。潛山之葬。實銘之。于是諸子復以爲請。乃作銘曰。黃氏著姓。江夏其初。有避唐亂。閩浦城居。逮君皇祖。爰徙于舒。旣沒而窆。遂葬太湖。潛山子仕。奉親北方。終養又卜。汝山之陽。神靈安之。遷徙何常。有美惟君。志大氣剛。學以澤之。蔚有辭章。力善徇義。其身可忘。謂逢文明。騰凌頡頏。誰斯所儲。屯悶弗張。間出一二。已韡其光。老以一郡。止于散郎。才之不契。由古則然。有城有室。附于潛山。刻詩讓實。以貽後傳。

太常博士彭君墓誌銘

君諱慥。字公謹。世爲潭之湘陰人。祖晃。考鼎。皆以輕財樂施。稱于鄉里。君第皇祐元年進士。除復州景陵尉。丁母喪。服除。調復州司理。舉爲江州彭澤令。丁父喪。服除。入祕書省。爲著作佐郎。知澧州石門縣。今上卽位。恩遷省丞。移知南儀州事。改太常博士。熙寧四年七月十三日。以疾卒于官。享年四十六。君莊重而可親。樂易而有守。心無曲思。面無徇笑。居鄉有行義。仕宦二十年。有清概。未嘗問其家有無。至和中。辰州起事蠻溪。調諸州兵議所以窮討。君獻策任事者。以謂中國能使邊夷服者。爲有恩信爾。險穴莽谷。其民類禽獸。不可使。而其土不可耕。使吾得志。正所謂石田者。何事以爲我勞。今獨宜有以綏懷之而已。方是

時喜事功名者皆以爲擊之是已而師老財困朝廷屢遣使者卒如君策彭澤有修山觀唐狄梁公買田千畝與之于是觀有堂以祠公大吏欲移其田他觀君請留半奉公祀屢爭不得至以其議聞于朝卒從之石門得民僞爲印者法可以死情可以生死則得之者免遠官君戚曰殺人以自利歟遂傳生議交趾歲貢所過郡皆以鄉兵護送民病其騷獨君南儀罷之君平生不樂爲皎然者而歷宦多在偏州荒邑無事處故逡巡不大振作而其因物有作間見而時出之者蓋如此嗟夫君之不得其壽也君升朝贈其考大理評事妣許氏孝感縣太君娶戴氏封永安縣君子男二子民子中發舉進士二女未嫁以六年二月甲申葬君子歸政鄉永寧里土塘之原子民嘗從子游于荊州也于是來請銘迺爲之銘曰
有幽斯宮竅崇阜兮萬古一化孰天壽兮不取其德義不疚兮斯于博士爲不朽兮

范聖涂墓誌銘

君范氏諱遵道聖涂其字也士仕而不知其道也久矣苟焉者固漫不省可否惟利之故及狷者又頗亢激以輕去就爲事如聖涂幼已得官不肯輕進方且博學深養有以自得而後起既仕矣有所不合終不詭隨從容潔身以去夫必欲自信其所養吾知其非無志于仕者也不枉己以合人吾知其非有求于仕者也進不爲苟得去不爲矯亢豈不賢矣哉雖然抱其所有不少見于功用又不得壽而亡此古之人于天道報施所以致疑嗚呼是可哀也聖涂康定二年用從叔祖祕書監諷廕補郊社齋郎歲十一而孤二兄故已夭獨端飭自立事母李氏以孝謹聞養孀姑于家而與其子遊出處友愛人不見其爲外兄弟也

聚書延師友。以名教爲樂。凋人之急。親朋多賴以濟。嘉祐二年。始調郟州須城尉。隨改徐州司戶參軍。未赴。丁母喪。服除。調青州千乘縣主簿。令之政多不善。君以忠道之。又劾以理。又爭以義。皆不聽。州察其然。因從君刺令事。君謝不知。退而笑曰。此豈我事而我亦安能徇物乎。有去而已。因鎖其廳。舉進士。遂不復出鄉里。益治所居。闢園圃。築室廬水上。超然孤往。臨流坐石。吟嘯其間。世故一不以掛齒。熙寧三年十二月十四日。以疾終。享年三十八。君性寬厚。靜重。寡言。精識。曠度。有過人者。讀書不爲蹊徑。務致其極。爲文章。嚴簡有趣。嘗兩試禮部。喜事多學。至星歷氣數。皆通其術。篤于朋友。忠信樂易。久而不渝。而與子相好也。故其卒也。姜先生潛自魯來。與其姑之子張君褒。經治其葬。而使來趣銘。君之先自高平徙河南。後有官東平者。今爲東平人。比部員外郎諱正顏者。君曾祖也。君娶故兵部員外郎直史館梁公舊之女。生二男。德方。子是始。十歲。德恭。三歲。二女。長許歸姜氏。次幼。遂以明年二月甲申。葬君子郟州平陰縣安樂鄉樊山原先塋之左。銘曰。

大車六轡。載鸞載旂。不可以徑。寧柅而留。往旣艱矣。又薪其輶。嗟惟聖塗。誰司諸幽。北山礪岡。君卜先邱。聖塗歸哉。闕此千秋。

劉子中墓誌銘

君諱常。字子中。嘉祐八年進士及第。補郟州司理參軍。治平改元。君上書言。天下平治。由先朝臨御久。德澤法度所以馴致之。以遺今日。今命元之意。非是。宜于本功所自來。慎始昭孝。若曰承之而已。時踴其說。

治獄明以恕。多所平宥。數與上官相可否。事未嘗屈。二年七月十七日享年三十八。以疾卒。君幼喜讀書。長益自刻苦。沈酣出入。非若世俗口誦而膚取之者。于寢食造次。不輒廢書。以爲天下之至樂在是。而世所謂樂無以易。其發爲辭章。清拔有思。尤長于引古以視今。性和靜而疏達。與人交。忠信不渝。鄉人有過。誤者輒不校。居官閒。則與士子講學。所以教誘之甚厚。人大向之。以名節痛自砥礪。欲求天下之善。以身蹈之。冀有見于世。而志不就。蚤死。其不可悲也哉。劉氏濱州渤海人。曾祖諱應圖。祖諱爲。濰州昌邑主簿。父諱庚。河中永樂主簿。世貧業儒。至永樂滋貧。流寓四方。時爲名公大人邀客之。博學多識。善教諸子。而君弟蒙有文行。故門內講習。自相爲師友。其後蒙被召試校書郎。知唐州湖陽縣。以不合投劾去。君旣沒十二年。永樂及母夫人相繼以逝。又一年并蒙亦亡。嗚呼。其不重可悲也哉。自永樂徙河陽之濫縣。于是君季弟頤復管與君之配李氏。及其孤弼直。遂舉諸喪并葬于王屋縣玉陽鄉之北原。實元豐二年七月七日也。君所著文三百篇。一女前亡矣。銘曰。

嗟惟劉君。其士之良。涵茹探履。學敏以彊。騃騃天驥。志騰八方。踽足跬步。孰有而亡。將概諸理。君乎何傷。

國博陳幾道墓誌銘

公諱修古。字幾道。姓陳氏。自太邱徙東平。曾祖某。祖咸卿。考肅。贈吏部侍郎。公少嘗舉進士。以兄任爲郊社齋郎。調瀛州樂壽縣主簿。改潤州司理參軍。丁母喪。服除。舉監大名府酒。遷定武軍節度推官。治平中。用薦者。改大理寺丞。知虔州安遠縣。以親嫌。自陳。徙監海州稅。今上登極。恩遷太子中舍。賜五品服。監開

封考城縣酒轉殿中丞知博州聊城縣事。未滿罷。又知劍州尤溪縣事不行。轉國子博士。耀在京常平米。坐法免歸。居七年。以元豐四年六月十二日卒。享年七十一。公性孝謹。少孤。事母夫人無違。及執喪。鄉人稱之。精敏善治事。在樂壽。民大饑。州委公賑之。活者十九。在大名。課溢緡錢三十萬。在武定。鞫正疑獄。之。久不決者。自聊城罷。縣人遮道。久不得去。前後當路爭薦之。晚節失官。退處里舍。和易寬靜。以酒自娛。親戚故舊相對。怡然無不足色。雖老精力強壯。過絕人。臨終授治命其子。如無疾者。嗚呼。公尙何所慊哉。初娶梁氏。封仙居縣君。生子二人。男丙。服儒。女嫁國子博士聶伯堅而亡。再娶何氏。封福昌縣君。遂以其年七月十一日。葬公鄆州須城縣南留村先塋之西。某祖妣仙源夫人。實公兄祕書監諱希古之子。以是知公之詳。無若某者。丙前葬。又以狀來。謹序次而爲之銘曰。

物有得喪。人用笑嘻。彼自來去。胡轉而隨。公以是故。失也安之。旣康旣壽。世考所詒。

國博陳長孺墓誌銘

公諱考標。字長孺。姓陳氏。曾祖諱咸卿。祖諱肅。贈吏部侍郎。考諱希古。贈祕書監。公以廕補太廟齋郎。調保州保塞縣主簿。光州司法。以處州龍泉縣令舉監汾州永利西鹽。得眼疾。所謂內障者。求醫以歸。又二年。致其事。除太子中舍。英宗卽位。改殿中丞。賜緋衣銀魚。今上卽位。進國子博士。熙寧五年六月五日。以疾卒。享年五十有九。公性至孝。幼失母。實鞠于祖母永安太君方氏。及長而祕書公分務南都。退居東平。其所以奉親自養。禮賓友。內外晏然。無所不樂。而忘其身之疾者。由公子子職盡也。如是凡十餘年。旣居

喪而方夫人猶在寢。及事二季父，益以謹順聞。與諸弟友愛相與，以安貧服禮爲事。歲時恭慎祀饗，自始事迨卒祭，朝服以俟，酌酒饋食，有數有序。每獻再拜興俯，屏息于几筵。如親其聲容而有所受命者。至婦子侍御，率以祇恪無敢跛倚。與朋友久而不渝，和易以愛人。雖賤天遇之有禮，自祕書公之亡，于是三十年鄉里之亟盛亟替，朝譽而暮毀者，凡幾家。至論清白有常，能持其門戶，則人必指陳氏而稱公曰：「吉德君子也。」雖然，臨之以義利，蓋有不可動者。保塞上官或屬以私，公謹對曰：「不可。」僚友謂之曰：「以是居卑，非身謀也。」公曰：「士窮達得失，不有命乎？而道固若是。」議法有守，不可撓而本之以恕。疑者必傅輕，多所平宥。汾州課增衍，于格當賞矣。俄以疾廢而至于亡。鄉人莫不咨嗟，以善人不得報爲惜。公少舉進士，有聲名。善作詩，晚讀佛老書，信事頗篤。夫人李氏，故崇儀使榮州刺史緯之女，生四男，昭早世。熙熙默皆服儒。一女歸鄭儒，繼室夫人之妹。封金華縣君。先三年亡，生一女不育。七年四月二十四日葬。公于鄆州須城縣盧泉鄉鄒上里先塋之甲穴。公某長舅也。方不幸幼孤，實公字之。又教之以俾成人于葬也。其可以不銘。銘曰：

洵惟博士，孝悌有儀。惟蓄不施，惟善不著。惟其命之，是以順之。惟德不疵，何公之悲。

陳仲明墓誌銘

君諱孝嘗，字仲明。某生十年而考妣棄其孤，實鞠于外祖父贈祕書監陳公。是時公以疾退居東平里第，將沒，以劉氏孤屬其五子某。當時竊自惟念，親旣不得而見之，終乃幸得諸舅從之，其庶矣乎。其後長立。

竊食于仕。出處二十年間。舅氏之相次亡者四人。獨君一人者在。而以風痺臥家。雖然。每以事若告假過鄉里。時得拜其左右。瞻候其安否。語言相問訊。尙足以自慰其念母罔極之意。而今又亡矣。當時之所從吾母之同氣。于是遂盡嗚呼。其不可悲也哉。君祕書公第二子。性謹孝。侍疾執喪。能盡其志。與兄弟相友愛。交人有信義。少時讀書作文辭。尤刻苦爲詩。旁治醫藥陰陽之學。將葬。患葬師多拘。因自究其書。有所去取以從事。無違于禮。尤喜佛書。通性宗。蓋有自悟者。其論雖禪學。老師往往爲屈。故恬夷安分。無慕乎外。初。祕書公爲尙書屯田郎中。年六十得疾。求致仕以恩任君。君曰。大人小疾。輕去而爲其子計。某未安也。公遂分司南都。曾祖諱咸卿。祖諱肅。贈尙書吏部侍郎。祕書公諱希古。君娶馮氏龐氏。子男五人。曰浩。曰湜。曰冲。曰澹。曰洵。皆舉進士。浩。冲。嘗與計階。七女子。二已嫁。四幼亡。一在室。君之亡。實元豐五年七月三日。享年六十八。遂以其年九月二十八日。葬于鄆之須城縣盧泉鄉先塋之原。合以馮氏。銘曰。嗚呼陳氏。遠有德社。中嘗振顯。報施未侈。逮君之世。寢微弗興。而以孝弟。鄉里滋稱。學行恂恂。視其諸子。德後必昌。庶將在此。

陳行先墓誌銘

君諱孝若。字行先。姓陳氏。東平人。曾祖咸卿。祖肅。贈吏部侍郎。考希古。贈祕書監。君資夷謹。持重有志識。祕書公仕有清節。爲尙書郎。以疾分務南都。居里舍。教諸子以學。君嘗讀書自刻勵矣。已而幡然曰。親疾而養不足。吾于子職。將擇其力易而功近者。迺獨以治產自任。服勤勞。躬織畚。始于至微。粟儲而縷積之。

闕田桑以植本。又有所懋居以化有無。蓋其性仁。故知所取予。智故知所變通。信故能交。約故能持。居久之。遂以富稱鄉里。自祕書公捐館久。其叔若兄仕不達。兩兄以病臥家。食口滋衆。緩急皆賴君以濟。鞠養叔兄孤女。以禮嫁仕族。舉大喪六七葬之。人有所謁。隨事周給。至于自奉養。簡儉不易。儒素。晚年薄滋味。嗜好益淡泊。向有所營殖者。皆寢不復爲。故嘗觀君之于財。其所以生所以用。與所以守者。其道蓋出于此。則與夫詐力貪刻賤義。放欲亡厭。以爲富者。甚異矣。喜讀佛書。談性命。疾革不亂。自制棺。圖像遺其子而卒。元豐三年四月十日也。年六十。娶楊氏。尚書比部員外郎歸一之孫。子三人。長男女皆亡。幼曰慥。孫曰詡。說。其年七月十一日。葬于鄆州須城縣南留村先塋之西。某妣陳夫人。實祕書公長子。方先君官湖南。祕書公爲遣君從行。逾年先君夫人繼棄其孤。其孤既幼。喪事皆君治之。及某依外氏爲學。至長立得官。所以成之者。君之德居多。于是前葬。慥來請銘。銘曰。

宋宗室慈州防禦使宗博故夫人普寧郡君郭氏墓誌銘

夫人郭氏。曾祖暉。贈太子少師。祖守文。贈尚書令。譙王。父崇仁。贈安國軍節度使。夫人幼失怙恃。養于寡嫂王氏。逮成人。奉其嫂如所生。年十八。歸于皇叔慈州防禦使宗博。夫人性仁惠。端靜。奉舅姑以孝。接宗嫺以禮。撫羣下以恩。輔贊君子。休有令德。累封普寧郡君。熙寧三年十一月二十五日。感疾殞于寢。年四十一。一男一女皆早世。訃聞。上震悼。恤禮加等。寶慈宮嗟惜。爲之出涕。遣內司賓中貴人庀事。殯于京南。

奉先之佛舍。明年七月十四日。葬河南永安縣之塋。有詔詞林爲之銘曰。展彼夫人。柔溫靜嘉。蒿魂奄忽。戚里齋嗟。西原瀾逝。行楸羸靡。勒銘幽堂。淑聞不已。

壽安許夫人墓誌銘

壽安縣太君許氏。贈諫議大夫黃公諱珙之夫人。熙寧七年十二月二十一日。以壽終。明年春。其子太常少卿師道泣以謂某曰。吾少時被夫人教曰。黃氏世積德善。將必有發。豈不在吾之世。爾曹其可以不學。卽佐先子教訓。頗力。其後吾仲弟師說早世。獨與季弟師旦。以進士同時得科名。起家就仕。獲以祿養。師旦既以都官員外郎終。吾日懼衰薄。無以奉夫人。今不孝。夫人卽亡。將葬矣。惟是幽宮之銘。以累子。其母辭。方是時。某謫官衡州。且三年。因詳得夫人之行。夫人世衡陽人。其父勝。好施有遠識。衆以長者尊之。夫人爲女。善事其父母。爲婦。又善事其舅姑。睦其族姻。內外無間言。諫議公喜賓客。食飲其門者無虛日。皆夫人身自供具。內治不苟。上下安之。二子寔貴顯。饗封受社。更仙源仁壽長壽三縣君。以及今封。晚年不樂出鄉里。太常公爲請近郡。又兩監南嶽祠。遂居里舍。以便奉養。晨夕省侍。竭力致誠。察其顏辭。以爲休戚。歲時率婦子孫。會奉觴執膳。爲夫人壽。夫人顧之喜。每合燕親族。笑語酬酢。終日無倦。閭里于是咨嗟歎慕。凡語門戶之慶者。莫不指黃氏。以夫人爲有備福。而稱太常公曰。孝德君子也。夫人性慈仁。尤喜佛事。誦其書。凡十八萬卷。有奇。平生少疾。將終。神明如常時。言語不亂。召族屬持其手。各有所囑。安然以逝。嗚呼。人之所慕而難至者。壽。既壽矣。或既昏疾苦。淹淹不支。不然。嗇其子孫。幸而有之。不克肖似。若夫人

享年八十八。身終康寧。有子甚賢。一女歸士人。孫曾男女至三十人。而補仕者五人。皆材良自立。嗚呼。夫人可以無憾矣。是年某月某日。葬于某鄉某里。諫議之塋。銘曰。女婦惟孝。母也惟仁。惟睦惟則。以昌其門。福施厥德。天畀之年。有子惟卿。由教則然。定省左右。綵服華顛。及其三世。誥誥在前。豈無智達。或累死生。臨此大故。夫人不驚。嗚呼賢哉。世考斯銘。

仁壽趙夫人墓誌銘

知恩州事尚書比部郎中王君諱荀龍之夫人仁壽縣君趙氏。上世洺州人。自曾祖羽徙博之聊城。祖韜。父繼永。皆不仕。伯父繼昌。事太宗。祇候閑門。任事北邊。有威名。夫人幼善事父母。既嫁。其姑路氏有賢行。而嚴正少可。惟夫人能得其意。及將終。語人曰。始吾兒早孤。求配常危。慮無以成王事者。今得吾婦。死瞑矣。後比部君寢顯。夫人益以禮自約。每臨居養之華美者。未嘗不戚然興言。念其姑之不待饗而已。乃有此也。愛諸子均一人。不覺其有異出者。比部常任子。欲先諸從子。夫人欣然成之。養孤族子數人于家。恩意無所間。蓋婦人之行。于是爲甚難。而夫人優爲之。平居寡笑語。御家有法。事至雖煩。而徐應之。必中理。日誦佛書。以爲常。性寬而正。故人或以欺而不能以妄說之也。嫁三十七年。年六十一。元豐二年十一月三日。以疾卒于其夫官舍。初封孝義。後更今封。生三男子。長巖。叟。河陽節度推官。監晉州煉礬務。好學。有節行。次濱。叟。堯。叟。六女。嫁者四人。其二與次二男皆早亡。孫男女七人。明年三月。葬于濟陰廣武原之先塋。銘曰。

孝至于不忘其親。愛至于不獨其子。厥家日興。不享祿社。是惟令德而壽此止。貴孰共之。欲養不俟。夫哀子慕。嗚呼曷已。

吳郡君墓誌銘

濮陽郡君吳氏。世家撫州之崇仁縣。贈太常少卿諱鏜之孫。故都官郎中諱有鄰之子。故給事中天章閣待制致仕郭公諱申錫之夫人。郭公始娶陳氏。實爲我妣之妹。旣蚤亡而再室。夫人某以陳夫人故。數出入拜夫人。今諸子舉公夫人之葬。而以銘見屬。宜不可辭。乃爲銘曰。

懋惟吳宗。篤生夫人。其字道卿。其名嗣真。幼不戲嬉。獨近文字。性敏以勤。有誦輒記。至凡女工。不學而能。事親克孝。善養善承。父母以是。賢之篤愛。好逮亦多。慎擇厥配。二十八歲。乃始有家。不逮事舅。姑壽則遐。承顏順辭。始終不替。藥劑膳羞。必躬乃饋。陳氏有子。六人皆幼。夫人撫之。己子不後。陳氏兄弟。間至猶昨。夫人遇之。己族不薄。給事立朝。侃侃言路。不以家卹。夫人之助。謫官濠梁。不以愛戚。姑尤安之。以時分力。居姑之喪。哀毀不勝。廬居墓下。又以孝稱。自其爲女。爲婦爲母。動止有節。言語不苟。持循家法。不以智更。諸子自教。卒俾有成。內外睦婣。法度妥妥。尤喜事佛。晚益不惰。治平五年。從夫河中。九月十八日。感疾以終。壽五十一。弗克永年。行豈不淑。而報乃愆。有男禮立。主將作籥。女亦一人。嫁宋文虎。居仁和縣。郡封濮陽。旣歿七年。給事亦亡。熙寧八年仲冬一日。遂合陳氏。從夫幽室。嗚呼夫人。始卒不虧。宜詩厥美。以永孝思。

李夫人墓誌銘

夫人李氏東光人。贈職方員外郎昭度之孫。故崇儀使榮州刺史緯之子。故祕書監陳公希古之冢婦。故國子博士孝標之妻。而某之舅母也。榮州本以儒者進。嘗鈐轄廣東。守北邊。更數州。皆有聲績。始與祕書公相友善。夫人數歲。常使出拜而約之婚。年十八。乃歸焉。既不逮事姑。而祕書公以疾退居里舍者十年。凡其食飲。夫人非自烹飪。藥非親調。皆不以進。疾甚。則出其奩中物。以有所祈。請無不至。及居喪。哀毀過人。方是時。祖姑永安太君方氏在寢。祕書公二弟。博士之弟四人。族屬蕃大。而門內之治。夫人實主之。上事旁接。各得其歡心。御下雖嚴。而人愛之。博士于祭祀特兢慎。夫人克相成之。既恭。孔時。性聰明。曉音樂。略知書翰。事佛甚謹。皇祐五年七月十三日。以疾卒于光州。其夫之官舍。年三十八。子男女五人。博士既賢。夫人而未嘗忘李氏也。故以其妹繼室。而仲婦又取其弟之子。夫人既葬八年。當熙寧五年。博士亦亡。其子熙以七年某月日合葬。而取銘于某。某幼孤。蓋依夫人以生者也。是宜銘。銘曰。

循法度。共祭祀。惟夫人克有是德。不愆壽。不侈葬。從其夫永安此。

贈刑部侍郎孫公墓表

公諱成象。字乾曜。姓孫氏。世家長沙。五代末。馬氏據有湖南。將吏皆其所自補。公之曾祖全。以材武爲潭州醴陵縣鎮遏使。庇憂捍患。常危亂中。衆恃以休戚。實有德于一方。生匡替。始仕皇朝。爲揚州廣陵主簿。以清白著名。生雋。隱曜。潛行。治居郡城南。輕財樂施。教子有方。里人以爲長者。而湖湘衣冠。論凡治家可。

法者。至今指城南孫氏。是爲公考。生子五人。而公次居長。性篤孝。事親能竭其誠力。而友其弟以愛。居父喪。致哀謹禮。鄉里稱之。好學問。爲文章。長于歌詩。善書。有法。有名場屋間。聞善見義。篤好而力行之。娶夫人李氏。家多貲。嘗析其屋。同門墼以女分。每將有訴。公曰。婚姻以利。末俗事也。而又以訟乎。是非士人之所爲。因謝絕之。後以事出旁郡。而母夫人以疾亡。旣還。伏棺悲摧。累日不能飲食。忽撫其子曰。吾不爲無後死。當免于聖人乎。其從先君遊。無所恨。語已號頓而終。年三十三。天聖元年三月二十七日也。夫人後公二十四年卒。二子。頤。今爲朝議大夫。荆湖北路轉運使。頤守桂州靈川縣令。一女。適進士丁咸。孫男四人。曾孫男六人。朝議君以才顯于世。自其升朝。每國家有事。郊廟推恩。其子以及其親。于是累贈刑部侍郎。嗚呼。公雖無所饜于其生也。而歿也。被名爵。燕世緒。子榮而孫承之。則爲善必有報。顧遲疾異焉耳。公旣歿。二年十月二十三日。葬于郭下鄉露仙里。又五十三年。當元豐四年三月二十七日。開封府推官奉議郎。充祕閣校理。劉某以文表于墓。夫人李氏。萬年旌德縣太君。自有誌銘。嗚呼。公之死。可謂過于厚者也。古之人。制中以爲常。然亦曰。喪過乎哀。雖過而不可議者。厚故也。公視其子。足以立。知其不爲無後而死。則公之志。可哀也。而不可議也。夫厚其親而死。人莫得以議。斯可以無憾矣。而尤有可哀焉。誠在公有高于人者。未及施。而止。獨施之其身而已。此其命也夫。此其可哀也夫。

祭文

滑州祭鄒國公文

自夫子沒。邪說肆行。歷歲百餘。而孟子出。以身徇道。于是夫子之道明。人到今師之。歷世緬邈。弗知所報。國家選講師。設科目。以其書繼五經後。又詔封鄒國公。配享夫子廟。位竟國公之次。學士大夫。頓首幸甚。以謂是夫子之心也。州以詔令從事。將擇日置像位焉。敢具昭告。

祭丞相韓儀公文

維大觀三年歲次己丑十月壬申朔初二日癸酉。奉議郎武騎尉彭城縣開國男食邑三百戶賜紫金魚袋劉某。謹以清酌庶羞之奠。祭于故丞相儀國韓公之靈。惟公氣間堪輿。秀鍾嶽瀆。來輔昌運。協興盛福。自結明主。孰云夢卜。高陽開府。初叨采錄。及長天樞。復備僚屬。飲食教誨。始終樂育。卒議姻好。不遺寒族。逮予南遷。仲婦晝哭。雖反于室。公睠彌篤。瘴嶺蠻陬。問遺以續。高誼仁心。迴出流俗。疑承得謝。脫屣寵辱。樂道恬養。淡然自足。天下具瞻。日俟還復。袞衣龍節。匪暮伊夙。天難謹斯。云何不淑。哲人已萎。百身寧贖。常水之陽。西山之麓。鬱鬱佳城。吁嗟埋玉。斐辭告哀。曷展心曲。

祭沈太常文

惟君之生。冥孰宰持。才高而莫致。蓄大而不施。世之人徒愛其外之英華兮。曾未見其中之礪砢。好之者雖衆。莫能以力兮。惡之者亦足以顛擠。惟古人之莫不爾兮。亦惟君之所自知。

祭趙元考文

維某年月日某官某致祭于故翰林趙公元考親家之靈。惟公德行之稟兮。清淳而精粹。學問之積兮。該通而博備。自文字以來兮。前言之與故事。雖幽渺詭祕兮。罔散殊之弗記。其中無不有兮。人名之曰武庫。與物未嘗競兮。世推之爲國器。系靈源之休兮。克承厥世。覽皇德之光兮。亦華于仕。外若可以親疏兮。內挺然其志。茲俄鍛翼而南飛兮。亟興疾乎禮之渙。曾未云更晦朔兮。遽大故之及止。惟死生固自有命兮。公已久明乎此理。曰憂患爲傷其生兮。是世以進退爲休戚者之言爾。嗚呼哀哉。予與公交兮。以澹而成。三十餘年兮。事予以兄。館閣各途有並游之樂兮。婚姻晚契締深好之情。駭書音之來訃兮。浩哀涕之如傾。胡善人之不淑兮。儻所謂天道之誰與明。儻沅江兮。緬緬望楚雨兮。冥冥蘭芷兮。香歇猿鳥兮。悲鳴慨予方繫跡于蘭溪之濱兮。不得祖飛旆之東征。聊寓情于斯文兮。代望門之歌聲。敬致薄奠兮。以薦斯誠。

祭丁上杭文

維元祐八年歲次癸酉二月戊申朔某日某甲子。具位劉某。奉故友上杭府君公明丁君之喪。葬于鄆之北原。謹遣隨行指使三班借職王穆。致肴醴之品而祭之。以文曰。嗚呼公明。曩時盛年。氣狹雲路。顧語富貴。可以指取千金盡散。以交雄豪。志願力命。不相爲謀。爛漫醉吟。清新竊妙。天葩寶璣。霏落談笑。造次居養。不啻于窮。服必華潔。食必珍豐。薦進吹颺。豈無知己。至其得失。誰使誰尼。晚假貴侯。以紆青綸。萬里逾歲。亟聞騰還。今我東來。燕樂故里。魁壘軒昂。獨不見子。想象生平。綢繆話言。磅礴之氣。得于遺編。嗚呼公明。紛紛古人才。不盡偶。惟有所傳。恃以不朽。獨念子世。寢微寢艱。客骨地上。垂三十年。爲子買田北原。龜

食。土水深厚。佳城吉宅。以子之考。及二妣喪。劉氏朱氏。庚穴之藏。子及室邢。窆于甲位。左右相望。冥豈不慰。不易舊斂。周以重棺。日時協良。歸哉惟安。嗚呼公明。誰語皎皎。沒而無知。來歆罇酒。副此悲思。

熙寧九年祭先塋文

維年月日。孝孫男某。謹遣新婦任氏。長男跂。躬詣先塋之次。用某日具清酌庶羞。致享于三代考妣之靈。惟某幼而孤。流離四方。弗克踐先王恭信哀三禮。得罪于上帝神明。不敢道。乃天實悔禍。保佑先人緒餘。弗俾失墜。以活其嗣人。猶傷于貧。三十年于茲。始克大事。如是。其在某之身。何有。惟心以率力。守視洒埽。恪恭于墓次。終以報稱先人。則曰豈敢。如以自竭其愚。則曰庶幾哉。然方有罪于朝。爲世大僂。志弗克遂。又五年于茲。雖日衰疚。繼之以夜。其心惻然。而官禁有誅。祈天高。亦罔克有濟。蓋蚤夜惟念。古之人有禮。祭祀欽承。婦子是賴。用敢祇承禮意。命之從事。以代不肖之身。明德加惠。尙願歆茲。乃若敬念所願。則忠心于是。終身如是。曷云敢忘。曷云敢違。

祭蹈文

祭于亡男奉議二郎之靈。惟汝孝于父母。善于弟兄。行己應物。一以至誠。橫逆不校。憂樂不驚。少自刻苦。以取科名。安其所係。克有厥聲。士林同詞。期以公卿。嗚呼哀哉。德吉氣靜。此壽之理。吾謂異時。必將賴爾。天胡奪之。遽先吾逝。白頭衰年。哭爾壯子。事之顛左。有至于此。嗚呼哀哉。書來報疾。汝批紙尾。凡數十言。常時無異。云偶大病。十去八矣。醫言無他。數日可起。本不馳告。念非得已。地遠思親。願遣一弟。意緒昭昭。

有敍有紀。但怪所書多不成字。中心悶默。憂恍如醉。亟遣醫先。翊日計至。嗚呼哀哉。天之賦汝。亦既粹美。反嗇其生。使不少俟。冥誰宰持。必有所以。豈曰偶然。自生自死。殆吾不修。釁惡積累。罰鍾汝身。汝則何罪。聞汝臨終。妻孥守視。汝父汝母。汝兄弟妹。無一在傍。四顧歔歔。若有所屬。索筆與紙。手不能持。強語其子。曰。幸千萬。可獨寫此。嗚呼哀哉。又聞前年赴官邊鄙。出門傍徨。密語二季。曰。此行役。忽不自意。安得休哉。同此庭侍。祝勿告吾。懼詒親累。豈汝自有所知。魄兆已至。使吾蚤聞。必留汝止。而不吾告。何所牽制。嗚呼哀哉。又聞初疾。風寒爲厲。頭目痛昏。火壯軀體。付之庸醫。語爲脚氣。諸所毒藥。達投大劑。一晝夜中。數十下利。陽脫陰轉。外浮中痞。瘦以滑泄。上益嘔噦。才十餘日。摧此魁壘。至于大故。神不亂味。醫乎不仁。殺人何易。數雖有定。豈無冤者。嗚呼哀哉。人之有生。會歸于無。浩浩萬古。瞬息須臾。其間長短。何較錙銖。古之達觀。宜此萬殊。禍福同戶。彭殤一區。忘情齊物。與天爲徒。吾視斯人。豈無愧歟。情累纏著。若有根株。八月庚申。見汝喪車。慘慘儀象。纍纍縷纊。聲慟親友。歎聞道途。天高神幽。吾哀莫呼。江盡海竭。吾淚有餘。髣髴面目。嗟何及乎。惟有盡心。撫汝諸孤。松楸之下。一室山隅。以候歲月。歸汝先墟。

忠肅集卷十五

五言古詩

讀書

西風入梧桐。白露下雲漢。灑灑晚秋色。清涼復神觀。歲月不我與。料理前日慢。念此平生心。所樂在黃卷。太羹與玄酒。梨棗及俎簋。滋味要足口。更復恨未見。燈火夜可親。巾箱字甚憚。紛紛事是非。碌碌世治亂。千古守糟粕。未免斲輪歎。聖賢有堂奧。大道堪夷坦。是爲名教樂。足以了衰晏。惜日營珠金。投身營歌管。彼志各自言。難以一理貫。

老子畫象

敵周僂于文。老子談大道。仁義已末流。體法固行潦。虛無抱玄珠。清淨爲至寶。掙斗息羣競。死聖止大盜。謂可愚斯民。狂瀾復旣倒。不知世大變。萬僞火就燥。欲以區區言。反俗入義昊。渾淪五千言。道德河浩浩。漢嘗求其說。施用未深造。衣食已有滋。煩苛已能埽。惜哉衰世士。學術失探討。流而爲刑名。慘礪極枯槁。但見多申韓。舉皆罪黃老。聖人無常師。有善取與早。問禮固有然。誰謂孔徒小。遺貌知是非。君無論醜好。

雜詩六首

四序若轉轂。萬物變秋風。蕭騷籬邊月。赫赤江上楓。寒鷗坐晴屋。陰蟲淒暮叢。靈鳳杳何許。寂寂朝陽桐。咬籠中鳥。食飽勤好音。雖懷主人意。豈不思長林。出處謬前算。老大故谿心。秋衾耿寒夢。玉露曉如淋。古人有高致。妙與天地通。讀騷飲美酒。揮絃送飛鴻。杖藜步梧竹。閉戶閑僕僮。禍福有倚伏。念當守蒿蓬。我思彭江州。行已有風績。與善忘畛畦。靡邪立崖壁。堂堂生民望。奄奄斯道寂。何時持鷄酒。就子墳上漉。播州遷劉郎。夜郎放太白。秀木風所仇。人情有欣戚。嚴靈無終朝。斯文豈遂厄。我願蘇與黃。壽命等金石。至人有神遊。坐凌八荒邈。一息如鵬圖。萬里御羊角。蒿萊彼頻頻。晨多自喔喔。仙人喬與松。誰云不可學。

西齋觀雨

未庚謝餘炎。大火躡西極。開軒對朝雨。拭目看秋色。雲空相晦明。風縷乍斜直。聲繁自飄蕭。勢急忽淙激。方塘潛浪潮。萬瓦亂珠射。巢燕倦翻翻。庭蕪長紛紛。閒花洗幽素。秀木舞涼碧。清氣醒筋骸。餘爽入几席。跡希蔣翮徑。興高陶令宅。繞郭聽懽聲。登秋飽豐澤。良辰感孤宦。念我久行客。窮年不自樂。心跡兩何益。功名羞詭奇。歲月易類斥。聖人堂有奧。大道坦可適。胡爲世俗間。區區較尋尺。

縣齋秋日雨後寄李聖和

置問歲八月。祝融冒秋權。當代不肯歸。滯暑歎以延。金行奮剛義。天令懲驕愆。一雨惡氛死。百物疲瘵痊。陰陽戰既定。灑氣蘇天淵。擎斂物得性。豐給民有年。小軒占幽寂。危坐涼愴然。身如救炮烙。蓬山弄飛泉。冷風嘯梧竹。清響搖碧鮮。淨几少喧蠅。高簷除嘒蟬。煩心爽已蛻。塵觀清疑仙。于茲飭前懈。圖書獵陳編。

晤言隔朋類。披卷盟聖賢。樂此懷高風。北望心悵悵。

縣北馬上

五月暑雨過。緩轡來城陰。朝暉粲林莽。涼風弄衣襟。敢辭鞭策勞。邂逅得幽尋。斯人勤歲事。樂此膏澤深。芃芃黍稷豐。藹藹桑柘林。田翁可指食。蠶婦期織紉。稠儲與衣褐。卒歲無崎嶇。陶民帝有力。養物天之心。忘言樂其樂。此意良自謀。紆爲馬上句。比和擊壤吟。

答黃莘任道代書見寄

吾生本放浪。自比林壑人。謬此繼官組。試邑漳水濱。疆田占瀉鹵。戶俗籍羸貧。驛涂搔左臂。河流齧西漣。役者動淪產。居者無儲糶。科求困府調。期會嚴吏文。儒生仕學古。志在膏斯民。慨歎適于此。蹠蹠徒自勤。亦嘗紆厚斂。粗使窮褐溫。(原注)南宮夏稅折色。視他郡最重。前歲特爲申請。乞隨市直估折。不用諸色。得旨蠲三分之二。勞心米鹽屑。秉筆朱墨紛。尙賴厥俗古。椎然猶朴淳。因時罕訟訴。得以親舊聞。瞻言君子治。百里相依瀕。廚瀆候使介。南北交歡忻。議和六十年。中國勞勩耘。脂膏瘠黔首。歲月肥醜獯。燕山本華土。石管真自焚。祖宗赫大業。此願管經綸。遺憤鬱未泄。壯士常云云。天運無盛衰。吾民繫康屯。遠御在廊廟。勿憚躬觴殮。小官惠不恥。委吏孔所伸。(原注)君爲清河令。當信使驛路時。有供饋送迎勞困之嘆。故云。我亦走除道。折腰邊馬塵。緣茲有境會。每得言笑親。代去各匪遠。木落秋風辰。知倦黎侯寓。來卜子騫鄰。(原注)君始寓衛州。今見詢欲謀居汶上。東平我客久。蕃阜誠罕倫。齊魯儒學地。遺風今尙存。禮讓

行比屋。弦誦傳里門。玉京輦路近。非煙望氤氳。梁岑聳秀概。回源號通津。炊玉北陂稻。餽霜南浦鱗。名園富夏果。冬山下寒薪。滋味閩越足。物色吳楚賓。人物盛著錄。衣冠若雲屯。交朋三數子。英英鸞鶴羣。文章與言行。玉潔芝蘭薰。方舟洞庭甫。載酒樂郊春。羨君此謀吉。不必龜筮詢。我馬固已秣。君車亦宜巾。瑤音枉嘉問。凌紙天葩芬。聊茲緝里社。愧匪金玉珍。

中秋招趙滉

浩然天地秋。涼風日蕭索。憲也固非病。回焉不改樂。公秣已堪釀。冰輪有近約。以此邀子車。主禮豈云薄。送趙滉遊邊

風霜日夜肅。關寒塞草白。之子倦蓬蒿。結束遠行役。尺劍有壯懷。短褐無寒色。禮臺多黃金。義棗富白壁。河山數千里。趙魏繚遺跡。大事今在邊。爲我盡覽歷。威懷用表餌。是非入奇策。豈知榮陽秀。出以屢空迫。白鷺亭

危亭跨城巔。因洲名白鷺。開軒二水上。寓目萬景赴。風濤象魚龍。煙雲變汀渚。孤禽點鍾山。片席下吳浦。閒人得閒愁。憑欄歎今古。脈脈臨長江。寒潮自來去。

過彭澤

孤舟倚彭澤。高節懷淵明。餅粟會幾許。忽歸無留情。士生于內外。貴識所重輕。山高暮寒聳。江闊春風平。絃歌絕遺響。秫田今誰耕。我方事奔走。嗚呼愧先生。

庚信宅

南都號多士。庚信乃詞客。承家富縑緇。摛文爛組織。應教來春坊。日坐學士席。翩翾宮體謠。江左變風格。巨盜掀臺城。狂飊鍛孤翮。南飛江陵宮。杖策赴王釋。經綸投中興。感憤補天隙。大廈豈一士。終此陽九厄。陸機趨洛陽。夷吾入齊國。濯足聊委蛇。懷邦已悲惻。惜哉不遭時。渙忍無偉蹟。王室與身世。淪離兩何益。暮齒哀江南。聊將賦心跡。楚郡故城陰。或云此遺宅。寥寥舊山川。莽莽新黍稷。是非不可求。秋風暮烟白。

馬融絳帳臺

東京尙經術。人皆挾師才。惜乎章句間。門戶各異開。馬融號耆舊。太守南郡來。橫經坐絳帳。自處何崔嵬。帳前列徒弟。帳後歌弦陪。書生貧賤志。遽以聲色回。于今數百年。巋然但高臺。舊址半傾圯。欄檻生莓苔。溪光貯襟袂。南風動樽壘。高簷日向暮。燕雀亦徘徊。

題公安知縣柳應辰屯田默庵

語默本無常。此道知者寡。君子默諸心。志氣納陶冶。至神所安潛。可使萬物化。精微與道契。密不見纖罅。世俗默在口。鈐若偶人者。至其中所驚。逐逐散萬馬。我來觀默庵。虛白非外假。天地冥毫芒。今古一晝夜。物至紛無窮。酬酢甚閒暇。清淨老擘燭。寂寞揚氏駕。養此將有行。性命妙天下。相對坐終日。心愜如嘍炙。賦詩尙何言。聊爲默庵謝。

寄題柳郎中留客濫

主人真愛客。留客徹歸路。清溪環醉堂。客起驚四顧。人生異智愚。所急隨所慕。僕僕聲利徒。晝夜無息慮。雖有此不樂。身留意已驚。惟同主人心。乃知此中趣。主人韻瀟灑。恬不役世故。對物心有忘。簡言理自悟。清風元紫芝。令德黃叔度。卽之久益親。不知變朝暮。況復樽有酒。琴奕左右布。魚鳥馴不驚。孰與醉妖嫵。主人意于客。可謂甚無負。速應架溪流。坦坦堂下步。客至不須留。聽客自來去。

次韻王潛江見索近詩

與子一睽索。俄經百朝昏。塵勞觸新累。病懶荒舊聞。強之旋放失。殆若溝澮源。新吟妙思致。天葩發靈根。澹然體大雅。理愜如忘言。鼓旗締友社。壯志壓僅存。譬以趙魏弱。仰關支秦軍。君無疑敵囊。薏苡非珠琨。送鄒澤民還澧陽

人生寡會合。世路多穿機。吾得二三友。老鈍諧所依。澤民氣閎侈。詞筆如戈揮。狂鷲但思擊。生馬不可羈。彥修韻寒苦。獨以經史肥。捩眼鄙俗調。攘臂談聖微。直夫名流子。學性無愆違。冰玉瑩表裏。芝蘭自芳菲。嗟吾實款段。騏驥安可希。清樽寫江海。日獲從西圻。吟鋒互矜軋。醉笑相嘲譏。方懷青蒿愧。忽見黃鵠飛。明哲慎所蹈。勿與矜繳幾。秋風病池榭。苦雨沾裳衣。行矣歲華晏。重感人事非。玉音儻無斃。時有北鴻歸。次韻晉陵吳秀才傳見貺

予本疏野人。出處心已果。孔患四未能。嵇慵二不可。長年足憂勞。中懷幸安妥。風瘍臥疲軀。手足困攣跛。思君淳乎淳。處俗我爲我。五軫黃金徽。手開萬古鎖。天地自然聲。聽者不敢惰。君有元氣舟。微風以爲柁。

我亦薄外機。庶不擾世禍。儻伴荊州行。春江醉輕舸。

荊門軍惠泉呈李使君舜卿

蒼山抱西城。蒙泉發山麓。一泓養虛淨。大石坼巖澳。源脈滌滌來。星珠沸相續。何人瀦方池。不使聲瀑瀑。四圍疊琳琅。百丈蔭雲木。波底金蓮花。萬葉綠綺縟。畏清無魚蝦。固亦遠鷗鶴。俯視洞五臟。安敢濯兩足。循池隅西南。漸見泄泉溢。怒聲始可聽。勢如脫桎梏。涎沫卷飛練。澗鳴射碎玉。曲折谿路長。幽響遠連屬。安得朱絲絃。爲寫滄浪曲。派澤山下田。歲常稔甍穀。憧憧負餅盎。清入郡人腹。惠名由此歟。圖牒曾不錄。崔碣錢文章。無數不暇讀。亦欲有佳句。恐爲惠泉辱。使君心自清。館宮泉上宿。一勺蛻塵肝。豈比樽酒淥。磅礴壯士氣。常爲山水伏。天下幾林泉。無金買卜筮。空茲嚼屠門。野人眞碌碌。

煎茶

飯後開都監。旋烹今歲茶。雙龍碾圓餅。一槍磨新芽。石鼎沸蟹眼。玉甌浮乳花。詩思一坐爽。睡魔千里遐。茂陵病解渴。頓覺肺氣嘉。玉川風腋興。直欲凌風霞。論功著爲經。宜得鴻漸誇。膏粱麩蘗士。此物無與賒。

石生煎茶

石生蘭溪來。手提溪泉餅。謂言長官政。如此泉水清。歡然展北焙。小鼎親煎烹。一杯酌官壽。雲腴浮乳英。慚非百壺餞。眞意不自輕。澗沼蘋藻細。王公享其誠。冠蓋豈不至。紛紛空涕橫。珍重石子者。端有古人情。

游白雲山

西山矜霽色。林嶺遡晨光。萬象露榮秀。熙然數盛陽。扶筇喜暄暖。更得春日長。迴阡互虧蔽。叢薄紛青黃。溪橋覺飛動。漲水起連航。杳杳巖壑步。脩脩松桂香。道人誦所聞。坐使身世忘。誰我共出處。閒雲澹徊翔。風鈴有妙想。天樂浮圖傍。非徒愛石壁。行將營草堂。彼哉楚人子。記恨擷幽芳。

馬當山

馬當天下險。崔嵬大江邊。翠碧倚千丈。峭立萬仞淵。其背領羣岫。其麓滙飛流。鬱葱巖間桂。窮冬華葉鮮。豈無神仙人。縹緲居其巔。猿猱肆健捷。攀躋到雲烟。揚帆過其下。瞥若飛鳥然。仰觀動精魄。但見嶄青天。吾生媿仁智。而于山水便。終日叩舷坐。無暇窺塵編。有嗜固爲累。觸險不自憐。

湖溪道中

夜雨聲緜緜。朝雨勢未歇。行役良間關。炎歎暫祛遏。蘋藻香幽幽。陂池水活活。咫尺迷見聞。淋漓徹衣褐。坎泥甚膠凝。陸路無尺闊。飢僮與羸驂。十步九顛蹙。敲鞍脾欲僵。風蓋手屢脫。驚目不暇瞬。危魂亦已怛。處險貴能安。欲速或未達。聖禹嘗輻行。文公尙胡跋。彼勤事業大。吾勞簿書末。香城到長堤。軒眉解蹙額。大道吾所歸。寧爲險途奪。

久雨次路韻

江國多陰霖。雲氣所儲積。貫月仍彌旬。窮朝復竟夕。太陽暗經天。莫見黃道迹。風霏淋牀帷。蒼溜穴砌石。春澤農之瑞。泰甚豈其益。人言雨有數。四時合均適。前多後將少。物理固明白。我居苦湫陋。安得爽垲易。

棟梁生菌苔。書藥漬汗液。塞漏除泥塗。紛紛課奴獲。凌虛逃重腿。頗思兩鳧鳥。坐觀久溟濛。風伯豈無責。慰彼望歲人。私我窮居客。茲事但置之。一觴聊自釋。

富池口

順風雖宜帆。顛暴亦難用。浪擁江逆流。雲狂日昏霧。天公容飛廉。囊籥大開弄。蛟鯨快乘時。驤首出洪洞。舟楫多深藏。灣浦投缺空。我行斯可時。要當審靜動。況復舟弊鈍。羸師困僵凍。時上聖所臧。欲速禍或中。坐期天清明。連檣欣所縱。且傾淥酒樽。慰此清夜夢。

泛舟

湖光漾碧霄。飄然一方舟。綠舳屢環復。檀槳雙夷猶。雨色芰荷晚。風香蘋藻秋。鳧鷖解相信。隨橈過前洲。落落二三子。載酒相與遊。清言愜素尚。大笑忘幽憂。洞庭醉淵明。剡溪浮子猷。人生似飄瓦。所願非所求。濯纓漁父達。佩蘭騷人愁。不須吳姬婉。蓮間聽淫謳。鄙哉遁功業。方爲五湖遊。吾曹詩酒中。此樂爲最優。

憶山

昔者氣少銳。狂走登泰山。東峰候海日。危磴躋天關。上考秦漢事。遺文大碑頑。南浮九江會。廬阜幾往還。雙林到如家。瀑布聲潺潺。扁舟上湘水。南衡若屏環。魏閣坐香藹。祝融費躋攀。幽尋恣所適。曾不虞辛艱。其餘林壑趣。可數皆班班。建今歲十改。志氣日以孱。前時兩河吏。風埃走青綸。荊州乃澤國。自昔登臨慳。佳山到郢盡。平地千里閒。塵耳憶猿嘯。屐齒生苔斑。安得蒼翠咨。下落樽酒間。平生林邱志。未去心如瘝。

去就不勇決。將見移文訕。

送吳雍平涼令

洞庭葉微脫。衡陽雁未歸。秋雲招客思。偏向隴頭飛。風霜過商郢。飄泊游子衣。行邁豈不遠。在彼渭水沂。早寒關草白。九月邊馬肥。西州氣俗厚。長官民政稀。洪河繚勢勝。大山四蟠圍。登臨賦今古。壯志相發揮。官遊子誠樂。孤陋予何依。念此性疏朴。動輒觸世機。相逢幸燭理。義愜不謂非。扶持失其直。曲逢嗟願違。朋友日已削。道義誰與巵。離騷默自慰。但寄黃金徽。

寄潁州顧子敦

念君去南州。歲月忽如埽。豈無肺腑言。難爲音書道。客來自汝陰。盡說太守好。黃堂日無事。仁政浹稚老。承顏奉親歡。甘旨富魚稻。時時過西湖。樽酒媚花鳥。兒童爭拍手。共笑玉山倒。都城亦何爲。風塵驚昏曉。投身非所謀。養氣安能浩。思君便使腹。中有無價寶。昔者定交分。我已愧枯槁。豈知鴻鵠飛。翩然異鷓鴣。人生出處間。得失不在早。君看松與桂。俱有歲寒操。何時臨清觴。爲子傾懷抱。

送僧常陸

吾師來曲江。落落偉丈夫。靈標峙松雪。清韻輝冰壺。談高文字間。欲趨仁義途。飄然跡無累。青天白雲孤。振衣下懷楚。遂欲游京都。京都貴人多。駢門耀金朱。仁義卜知己。誰不顧子廬。況子兼外學。妙達性命樞。言隨禍福應。名利惟所呼。一出玩世故。應憶舊山隅。

庖婢病跛自臨鼎俎有詩

塘頭買鮮鱗。戢戢楊柳貫。不憂一日飢。遂可支兩膳。北方貴鯁魚。豈異此中鯁。但求杯盤充。焉問名實眩。莖之薑芥蔬。雜以紫菁綫。雖非梁肉豪。鄉思已過半。甘芳瀆蒙茸。軟白分片段。佐我新炊秔。珠琲光粲粲。春羹遠無慙。枯釜不足羨。吾子叨餐衰。安此軟煖燕。昔人意不佳。多緣噉脯麵。聖賢親鼎俎。毋庸厭烹饌。夜發白碑

晝行苦炎蒸。秣馬戒夜發。清夢失歸路。微風弄纖葛。星疏天無雲。獨有亭午月。太空生白煙。浩蕩萬里闊。細碎草木香。淋漓露氣滑。戚戚寒蟲聲。逐馬不暫歇。我行何區區。無乃害慵拙。傳聞猛虎多。宵路時出沒。四顧林莽中。精靈動毛髮。求全得憂虞。禍每乘所忽。君子審重輕。無勞避途喝。

冬日遊蔡氏園次孫元忠韻

偶來梁宋遊。得子共閒冷。杖藜古城陰。邂逅塵外境。恍思閤閣中。喧卑真坎井。晴霜蔽陰崖。朝暉潤陽嶺。田翁醉年豐。曉夕不知醒。園逕迎幽尋。林屋到深靜。凍禽時自驚。古木坐移影。憶雪指寒荻。占春驗枯梗。求田計良難。旅食飽已幸。暫得酒中趣。詎須求醪酹。短景忽催歸。何時後期請。

次韻吳戶曹師道秋

西風日已肅。涼雨霏層陰。豐澤飽歲事。徂節驚壯心。寒蟲攪夜思。滄浪夢秋衾。欲謝茂陵病。誰憐莊舄吟。題句龍緯職方海棠軒

使君西州客。慣見海棠紅。影纓出故里。揚馬來漢宮。醉賞坐乖隔。年年夢春風。荊州蜀門戶。地脈風氣通。此花何從來。根本移化工。使君有新第。幽寓如山中。小軒面城麓。交柯植雙叢。年光錦宮遠。顏色故園同。想當春苞麗。無日樽酒空。繁豔燒醉眼。顧眄增冶容。地勝不在大。意適物易充。雙輪粲兩朱。行將指炎封。

寄題定州楊君園亭

隱不在山壑。名園抱南城。梧竹有遠韻。泉石非世聲。林花品莫數。野鳥馴不驚。主人堂其間。對境心已清。舉遺笑錄錄。放言獨冥冥。新詩寫閒逸。其聲自和平。吾嘗考風俗。燕趙義而誠。自古志慷慨。其人尙功名。苟非勝絕地。烏可奪其行。士于內與外。罕能權重輕。主人不待識。定無世俗情。

御史臺柏下有叢竹久荒雜殿中劉中叟洗之監察孫君孚有詩知雜事劉某次韻

老柏寒昂藏。叢篠下紛列。未須論晦明。均敢犯霜雪。塵埃深蔽埋。蕪蔓困籠結。槁悴屈子容。飢墮伯夷節。殿中秉高義。利刃勇分別。病穀除蒿稂。蝕月救吞齧。還君歲寒姿。清風自交徹。念昔繞荒欄。三嘆生慕悅。重來十五年。笑我壯心折。幽懷耿相對。欲語不得說。

觀音院餞送章子平出守鄭州探得近字

大梁三尺雪。冰泥變塵盈。千驕國西門。儼若鐘在簏。使君御之行。往殿股肱郡。玉符佩祥麟。車旛舞飛隼。去國雖所懷。而在百里近。朝方背象魏。暮已跨封畛。滎陽介兩京。左右事控引。咽喉半天下。客車日交軫。閉關非人情。飾傳古所哂。使君錦幘仙。才業苦清敏。故應毀譽忘。要使仁義盡。昔賢此爲政。遺愛浹微隱。

國人賦緇衣。千載聲亦泯。二者在君與。無嗟設施寤。

送文與可同出守湖州

東蜀老儒者。吳興新使君。前更四州守。風政超古人。歸來天祿閣。袖手隨衆羣。一毫不染指。世味從甘辛。謂柔未易招。謂剛可以親。渾然鎮冒器。承以縑率文。詞章謝劖剛。天葩出靈根。冥冥古咸池。衆聽所臥聞。外物了無累。獨愛霜中筠。應憐歲寒節。落筆收天真。七賢與六逸。林下仍溪濱。對之浪狂醉。顧豈知此君。比年不多寫。造化慳至珍。而我得二紙。毫素餘清芬。留當雪霜展。可慰思慕勤。煌煌鐘鼎具。未許刊名勳。聊復詠黃鵠。南國垂朱輪。拔足出埃壙。投身當水雲。人與境相得。長鯨臥天津。冰壺地千里。雲屏山四鄰。醉月若下酒。茱萸沼洛蓐。仕宦子雖適。孤陋予何伸。曲蓬誰與直。坐遠蘭蕙熏。臨風寫高興。願寄江南春。

天蘇酒成次路韻

粵嶺酒萬戶。醞者無刑章。以茲于釀事。家家致其祥。驛人亦隨喜。聊自慰空觴。頗收諸家法。曹高及張王。不復使鄰舍。更笑甕下狂。軟熟秋穠潔。芬烈吳秣香。壩頭沸珠螳。罈面澄玉漿。人情喜自譽。謂可官法當。方時見初菊。燦燦浮冷黃。頽然此中趣。不覺鄉路長。格高氣滄聖。何至腸腐傷。區區美芹意。欲以酌后皇。餘醺到郡郭。恨無嘉賓將。增釀更加數。從今百憂忘。

食鱠

知幾張季鷹。歸懷託江鱸。鱸魚今不數。未若魴鯽最。根齋構椒蘭。蘆蕪碎珠貝。盈盤玉葉鋪。千縷紅雲碎。

佐以晚菘羹。玉飯香藹藹。飽行慙素餐。捫腹放衣帶。昨來溪夏乾。市空無可奈。徒有彈鋏吟。何能飽幼艾。安得東海鯨。不憚生物害。揮刀滿金盤。對列酒池外。

植菊

春花悅時人。賞玩紛僕僕。南園一夜風。地上紅盈掬。我似鹿皮翁。祇愛晚秋菊。團團綠玉叢。移趁煙雨鬪。願言早芬敷。重陽日已促。煌煌想金葩。況此風露足。豈止插滿頭。服之明兩目。滋養漑清泉。圍護編翠竹。多開萬鈴奇。勿變桃花俗。酒熟落帽天。不作牛山曲。

菱角

洪池富水物。擘波收紫菱。春華雜青黃。夏蔓相牽仍。迨彼風露足。芒角秋實登。剛銛事利觜。扶挾如有朋。雙鋒尙可喂。四出尤足憎。昌歎固有嗜。羨菴非所憑。外觀乏婉軟。中質韜玉冰。取物取諸內。惟彼識者能。

朱李

珍果繁西園。登盤得朱李。白雪凋春花。縹丸結夏子。肉理漿包寒。膚衣粉凝紫。細碎輕菱芡。甘軟異瓜柿。不須論投報。聊復冰寒水。伯陽指仙宗。房陵詫遺美。鑽核乃獨善。王氏亦已鄙。味苦吾所幸。道旁豈云恥。君看齊物人。無用乃天理。

行藥

行年將七十。衰病乃其時。引茲地氣沴。州在大澤陂。一昨度炎暑。林莽居舍卑。山色不到眼。地無清泉滋。

晴陽則鑪冶。陰濁則蒸炊。氣腕疲。嘔洩。軀骸醉。支離。節氣近寒露。生意稍可支。故人在秦首。知我窮至斯。奩封衆藥品。皆自州土宜。形味紫團寶。苗榦西岳奇。靈如雪山草。秀比商嶺芝。是身本無有。疾病何用治。自愛聊爾爾。道人毋我蚩。丸膏或咬咀。何復求良醫。策杖行東圃。運動疏通之。收復我冲粹。驅散彼邪疵。養生固有道。一溉非難爲。千年鮑昭後。復有城東詩。

焚香

清泉薰石餅。南海寶洲香。下簾隱几坐。煙霏散中央。春雲乍凝聚。玉穗忽纖長。瑞鴨戲歡吐。雙臥不肯翔。佛國寶芬鬱。仙團花氣芳。真靈格杳冥。邪厲毆幽荒。安得逍遙人。肯顧來此堂。說我無上道。德音斯不忘。

虎枕

耒陽得奇枕。狀比猛獸姿。呀吻目睛轉。中有機紐施。持鬚世所戒。羊質還可嗤。莫作邯鄲想。曲肱吾所師。

